

御定全唐詩錄

土岐文庫

文庫17

W65

23



全書目錄卷第十一
目錄

北京圖書館藏
叢書
目錄
第十一卷

010185189398

文庫 17
W 65
23



御定全唐詩錄卷第六十八

禮部侍郎臣徐倬翰林院侍讀學士臣徐元正奉

旨校刊

呂溫

溫字和叔一字化光河中人貞元末擢進士第王叔文引為左拾遺轉侍御史使吐蕃元和初還進戶部員外郎歷刑部郎中坐構宰相李吉甫貶道州刺史轉衡州秩滿歸京不得意發疾卒溫天才俊拔文彩贍逸為時流柳宗元劉禹錫所稱新唐書曰溫副張薦使吐蕃時順宗新立叔文秉權與遊者皆貴顯溫畱絕域不得遷常自悲及還

全唐詩錄卷第六十八 呂溫



而柳宗元等皆坐貶溫獨免然性險訐譎詭復與
竇羣羊士諤謀逐李吉甫會吉甫病召醫宿里第
劾吉甫交通術士憲宗召訊虛將悉誅之吉甫救
免

劉夢得序云溫少時師吳郡陸質通春秋入從安
定梁肅學文章得一善輒盱衡擊節揚袂頓足勇
於藝能咸有所祖

徐獻忠曰衡州早擅宏詞富矜搖藻五言律亦多
綺拔惜其內有泛思外有遺象不能自振其餘波
耳

古體詩

奉勅祭南嶽

皇家禮赤帝謬獲司封域致齋紫蓋下宿設祝融側鳴
澗驚宵寐清猿遞時刻澡潔事夙興簪佩思盡飭危壇
象岳趾秘殿翹翬翼登拜不遑顧酌獻皆累息贊道儀
匪繁祝史詞甚直忽覺心魂悸如有精靈逼漠漠雲氣
生森森杉柏黑風吹虛簫韻露洗寒玉色寂寞有至公
馨香在明德禮成謝邑吏駕言歸郡職憇桑訪蠶事遵
疇課農力所願風雨時迴首瞻南極

古興

越歐百鍊時楚卞三泣地二寶無人識千齡皆棄置空
巖起白虹古獄生紫氣安得命世客直來開奧秘劍任

荆鐘看玉從投火試必能絕疑惑然後論奇異

岳陽懷古

晨飈發荊州落日到巴丘方闕剗剗利可接鬼神遊二
湖豁南浸九派駛東流襟帶三千里盡在岳陽樓憶昔
鬪群雄此焉爭上游吳昌屯虎旅晉盛驚龍舟宋齊紛
禍難梁陳成寇讐鐘鼓長震耀魚龍不得休風雲一蕭
散功業忽如浮今日時無事空江滿白鷗

同舍弟歲暮寄晉州李六協律三十韻

古人猶悲秋况復歲暮時急景迫流念窮陰結長悲陽
鳥下西嶺月鵲驚南枝攬衣步霜砌倚杖臨冰池怳怳
若有失悄悄良不怡忽聞晨起吟宛是同所思有美壯

感激無何遠栖遲推藏變化用掩抑扶搖姿時傑豈虛
出天道信可欺巨川望沆濟寒谷待潛吹劍匣益精利
玉韜寧磷緇戒哉輕沽諸待矣自寵之伊我抱微尚仲
氏卽心期討論自少小形影相差池比來胸中氣欲耀
天下奇雲衢兩沛艾煙閣雙萎蕤幾年困方炳一旦迷
多岐道因窮理悟命以盡性知事去類絕絃時來如轉
規伊呂偶然得孔孟徒爾為早行多露悔強進觸藩羸
功名豈身利仁義非我私萬物自身化一夫何驅馳不
如任行吾安命審所宜勸君休感歎與予陶希夷明年
郊天後慶澤歲華滋曲水店花雪香街青柳絲良時且
暫歡罇酒聊共持閒過漆園叟醉看五陵兒寄言思隱

處不久來相追

道州觀野火

南風吹烈火焰燒楚澤陽景當晝連陰天半夜赤過
處若彗掃來時如電激豈復辨蕭艾焉得分玉石蟲蛇
盡燦爛虎兕出奔迫積穢一蕩除和氣始融液堯時既
敬授禹稼斯肇迹遍生合穎禾大秀兩岐麥家有京坻
詠人無溝洫感若悟焚如功來歲終受益

登少陵原望秦中諸川太原王至德妙用有水術
因用感歎

少陵最高處曠望及秋空羣山噴清源脉散秦川中荷
鍤成雲雨由來非鬼工如何盛明代委棄傷幽風涇灞

徒絡繹漆沮虛會同東流滔滔去沃野飛秋蓬大禹平
水土吾人得其宗發機迴地勢運思與天通早欲獻奇
策豐財叙西戎豈知年三十未識大明宮卷爾出岫雲
追吾入冥鴻無為學驚俗狂醉哭途窮

風詠

微風生青蘋習習出金塘輕搖淡林翠靜獵幽徑芳掩
抑時未來鴻毛亦無傷一朝乘嚴氣萬里號清霜北走
摧鄧林東去落扶桑掃却垂天雲澄清無私光悠然返
空寂晏海通舟航

上官昭容書樓歌

貞元十四年友人崔元亮于東都買得研神記一卷有昭容列名書縫處因用感歎而作是歌

漢家婕妤唐昭容工詩能賦千載同自言才藝是天真

不服丈夫勝婦人歌闌舞罷閒無事縱恣優游弄文字
玉樓寶架中天居絨綺異萬卷餘水精編帙綠鈿軸
雲母擣紙黃金書風飄花露清旭時綺窓高掛紅綃帷
香囊盛煙繡結絡翠羽拂案青琉璃吟披嘯卷終無已
皎皎淵機破研理詞縈綵翰紫鸞迴思耿寥天碧雲起
碧雲起心悠哉境淡轉苦坐自催金梯珠履聲一斷瑤
堦日夜生青苔青苔閔僊關曾比羣玉山神仙杳何許
遺迹滿人間君不見洛陽南市賣書肆有人買得研神
記紙上香多蠹不成昭容題處猶分明令人惆悵難為
情

近體詩

蕃中拘留歲餘迴至隴右先寄城中親故

蓬轉星霜改蘭陔色養違窮泉百死別絕域再生歸鏡
數成絲髮囊收拔血衣酬恩有何力祇棄一毛微

喜儉北至送宗禮南行

洞庭舟始泊桂江帆又開魂從會處斷愁向笑中來惆
悵看殘景殷勤祝此杯衡陽刷羽待成取一行迴

道州途卽事

零桂佳山水營陽舊日同經途看不暇遇境說難窮疊
障青時合澄湘漫處空舟移明鏡裏路入畫屏中巖壑
千家接松蘿一徑通漁燈生縹緲犬吠隔葱蘢戲鳥畱
餘翠幽花悅晚紅光翻沙瀨日香散橘園風信美非吾

土分憂屬賤躬守愚資地僻卹隱望年豐且保心能靜
那求政必工課終如免戾歸養洛城東

白雲起封中詩

題中用韻
六十字成

封開白雲起漢帝坐齋宮望在泥金上疑生秘玉中攢
柯初繚繞布葉漸蒙籠日觀祥光合天門瑞氣通無心
似出岫有勢欲凌風倘遣成膏澤從茲遍太空

夏日題尋真觀李寬中秀才書院

閒院開軒笑語闌江山併入一壺寬微風但覺杉香滿
烈日方知竹氣寒披卷最宜生白室吟詩好就步虛壇
願君此地攻文字如煉仙家九轉丹

經河源軍漢邨作

行行忽到舊河源城外千家作漢邨樵採未侵征虜墓
耕耘猶就破羌屯金湯天險長全設伏臘華風亦暗存
暫住單車空下淚有心無力復何言

劉郎浦口號

吳蜀成婚此水潯明珠步障屋黃金誰將一女輕天下
欲換劉郎鼎峙心

貞元十四年旱甚見權門移芍藥

綠原青壠漸成塵汲井開園日日新四月帶花移芍藥
不知憂國是何人

鮑溶

溶字德源元和四年進士第與韓愈李正封孟郊

相友善其詩氣力宏贍博識清度雅正高古衆材
無不備具

古體詩

羽林行

朝出羽林宮入叅雲臺議獨請萬里行不奏和親事君
王重年少淡納開邊利寶馬雕玉鞍一朝從萬騎煌煌
都門外祖帳光七貴歌鐘樂行軍雲物慘別地簫笳整
部曲幢蓋動郊次臨風親戚懷滿袖兒女淚行行復何
贈長劍報恩字

織婦詞

百日織綵絲一朝停杼機機中有雙鳳化作天邊衣使

人馬如風誠不阻音微影響隨羽翼雙雙繞君飛行人
豈願行不怨不知歸所怨天盡處何人見光輝

怨詩

女蘿寄松柏綠蔓花綿綿三五定君婚結髮早移天肅
肅羔雁禮泠泠琴瑟篇恭承采蘋祀敢效同車賢皎日
不畱景良時如逝川愁心忽移夢花貌無歸妍翠袖洗
朱粉碧階封綺錢新人易如玉廢瑟難為絃寄羨舜華
木榮君香閣前豈無搖落苦貴與根蒂連希君舊光景
照妾薄暮年

秋思

朔風吹雁翼遠別無人鄉君近雁來處幾回斷君腸昔

奉千日書撫心怨星霜無書又千日世路重茫茫燕國
有佳麗蛾眉富春光自然君歸晚花落君空堂君其謂
不然歲晚雙鴛鴦

顧兔蝕殘月幽光不如星女兒晚事夫顏色同秋螢秋
日邊馬嘶武夫不遑寧燕歌易水怨劍舞蛟龍腥風折
連枝樹水翻無蒂萍立身多門戶何必燕山銘生世不
如鳥雙雙比翼翎

岐路

北風送微寒徒侶勤遠程憂人席不暖殘月馬上明飄
飄岐路間長見日初生重嶂曉色淺疎猿寒啼清人間
多岐路常恐終身行回見四方人車輪無留聲空谷亦

堪隱下田非懶耕古人有遺訓飽食非親榮我生禮義
鄉少小見太平賢聖猶羈旅况復非其名

秋日山中寄懷李端公益

舊事與日遠秋花仍舊香前年繡衣客此節過此堂侍
臣不自高笑解繡衣裳眠雲有餘意入鳥不亂行我恐
雲嵐色損君鞍馬光君言此何言明日皆異鄉明日非
今日山下道路長一從下山來天地再炎涼此中會難
得夢君馬元黃

采蓮曲二首

弄舟揭來南塘水蓮葉映身摘蓮子暑衣鮮淨鴛鴦喜
作浪舞花驚不起殷勤護惜纖纖指水菱初熟多新刺

採蓮搗來水無風蓮潭如鏡船如龍夏衫短袖交斜紅
艷歌笑鬪新芙蓉戲魚來往蓮花東

鳴雁行

七月朔方雁心苦聯影翻空落南土八月江南陰復晴
浮雲繞天難夜行羽翼勞痛心虛驚一聲相呼百處鳴
楚童夜宿煙波側沙上布羅連草色月暗風悲欲下難
不知何處容棲息楚童何為傷我身爾不曾作遠行人
江南羽族本不少寧得網羅此客鳥

李夫人歌

璿閨羽帳華燭陳方士夜降夫人神歲稊半露芙蓉色
窈窕將期環珮身麗如三五月可望難親近顰黛含悽

竟不言春思秋怨誰能問欲求巧笑如生時歌塵在空
瑟御絲神來未及夢相見帝比初亡心更悲愛之欲其
生又死東流萬代無回水宮漏丁丁夜向晨煙銷霧散
愁方士

采葛行

春溪幾回葛花黃黃麝引子山山香蠻女不惜手足損
鈎刀一一牽葛長葛絲茸茸春雪體深澗擇泉清處洗
殷勤十指蠶吐絲當窗嫋嫋聲高機織成一疋無一兩
供進天子五月衣水晶夏殿開涼戶冰山繞座猶難御
衣親玉體又何如杳然獨對秋風曙鏡湖女兒嫁鮫人
鮫綃逼肖色不分吳中角簟泛清水搖曳勝被三素雲

自茲貢薦無人惜那敢更爭龍手跡蠻女將來海市頭
賣與嶺南貧估客

採珠行

東方暮空海面平驪龍弄珠燒月明海人驚窺水底火
百寶錯落隨龍行浮心一夜生姦見月質龍軀看幾遍
擘波下去忘此身迢迢謂海無靈神海宮正當龍睡重
昨夜孤光今得弄河伯空憂水府貧天吳不敢相驚動
一團冰容掌上清四面人入光中行騰華乍搖白日影
銅鏡萬古羞為靈海邊老翁怨狂子抱珠哭向無底水
一富何須龍領前千金幾葬魚腹裏鱗蟲變化回陰陽
填海破山無景光捩心髣髴失珠意此土為爾離農桑

飲風衣日亦飽暖老翁擲却同雞卵

近體詩

薦冰

西陸宜先啓春寒寢廟清曆官分氣候天子薦精誠已
辨瑤池色如和玉佩鳴禮餘神轉肅曙後月殘明雅合
霜容潔非同雪體輕空憐一掬水珍重此時情

人日陪宣州范中丞傳正范侍御傳貞宴東風亭
人日春風綻早梅謝家兄弟看花來吳姬對客歌千曲
秦女畱人酒百杯絲柳向空初宛轉玉山看日漸徘徊
流光易去歡難得莫厭頻頻上此臺

山居

窈窕垂蘿澗蒙茸采葛花鴛鴦憐碧水照影舞金沙

酬范侍御

雲髻鳳文鈿對君歌少年萬金酬一顧莫惜十千錢
玉管傾杯樂春園鬪草情野花無限意處處逐人行
聞道中山酒一杯千日醒黃鶯似傳語勸酒太丁寧
紅袂歌聲起因君始得聞黃昏小垂手與我駐浮雲

懷僊詞

閬峯綺閣幾千丈瑤水西流十二城曾見周靈王太子
碧桃花下自吹笙

漢宮辭

月映東窓似玉輪未央前殿絕聲塵宮槐花落西風起

鸚鵡驚寒夜喚人

隋宮

桺塘煙起日西斜竹浦風迴雁弄沙煬帝春遊古城在
壞宮芳草滿人家

贈楊鍊師

紫煙衣上繡春雲清隱山書小篆文明月在天將鳳管
夜深吹向玉晨君
道士夜誦藥珠經白鶴下繞香煙聽夜移經盡人上鶴
仙風吹入秋冥冥

索王播侍御蜀牋

蜀川牋紙綠雲初聞說王家最有餘野客思將池上學

練裙紅葉不堪書

送僧遊天台

身非居士常多病
心愛空王稍覺閒
師問寄禪何處所
浙南青翠沃州山

吳中夜別

楚客秋思著黃葉
吳姬夜歌停碧雲
聲盡鐙前各流淚
水天涼冷雁離羣

張仲素

仲素字績之河間人宰相濬之祖也官司勳負外
郎曾與王涯令狐楚同為舍人合編其五七言絕
句為三舍人集

近體詩

天馬詞

天馬初從渥水來
郊歌曾唱得龍媒
不知玉塞沙中路
苜蓿殘花幾處開
躑躅宛駒齒未齊
縱金噴玉向風嘶
來時行盡金河道
獵獵輕風在碧蹄

閨人思

愁見遊空百丈絲
春風惹斷更傷離
閒花落徧蒼苔地
盡日無人誰得知

秋閨怨

桂魄初生秋露微
輕羅已薄未更衣
銀箏夜久殷勤弄

心怯空房不忍歸

秋夜曲

丁丁漏永夜何長漫漫輕雲露月光秋逼暗蟲通夕響
征衣未寄莫飛霜此詩一作王涯

碧窓斜月藹清輝愁聽寒蟬淚濕衣夢裏分明見關塞
不知何路向金微

秋天一夜靜無雲斷續鴻聲到曉聞欲寄征人問消息
居延城外又移軍

博山沉燎絕餘香蘭燼金檠怨夜長為問青青河畔草
幾回經雨復經霜

燕子樓詩

按白樂天序云此詩張仲素為關盼盼作也應屬仲素但諸刻屬關故兩存之

樓上殘燈伴曉霜獨眠人起合歡牀相思一夜情多少
地角天涯不是長

北邙松柏鎖愁烟燕子樓中思悄然自埋劍履歌塵散
紅袖香消已十年

適看鴻雁岳陽回又覩元禽逼社來瑤瑟玉簫無意緒
任從蛛網任從灰

段文昌

文昌字墨卿西河人家荊州相穆宗再相文宗出
鎮荆南移蜀

近體詩

題武擔寺西臺

唐詩卷第六十

張仲素 段文昌

唐詩卷第六十

七

秋天如鏡空樓閣盡玲瓏水暗餘霞外山明落照中鳥
行看漸遠松韻聽難窮今日登臨意多歡語笑同

晚夏登張儀樓呈院中諸公

重樓窓戶開四望歛烟埃遠岫林端出清波城下迴乍
疑蟬韻促稍覺雪風來併起鄉關思銷憂在酒杯

嚴休復

休復爵里未詳

近體詩

唐昌觀玉蕊花

終日齋心禱玉宸魂銷目斷未逢真不如滿樹瓊瑤蕊
笑對藏花洞裏人

羽車潛下玉龜山塵世何人覩薜蘿惟有無情枝上雪

好風吹綴綠雲鬟

元和中揚州唐昌觀玉蕊花盛開見一女子從以二女
冠者曰曩有玉峯之期自此可以行矣行百許步
冠者曰曩有玉峯之期自此可以行矣行百許步
遂不復見休復有詩元微之白樂天皆有和詩云

李涉

涉洛陽人初與弟渤同隱廬山後應陳許辟憲宗
時試太子通事舍人謫峽州司倉叅軍太和中為
大學博士復流康州自號青谿子

張為作主客圖以孟雲卿為高古奧逸主以涉為

入室

古體詩

鷓鴣詞

湘江煙水淡沙岸隔楓林何處鷓鴣飛日斜斑竹陰二
女虛垂淚三閭在自沉惟有鷓鴣啼獨傷行客心
越岡連越井越鳥更南飛何處鷓鴣啼夕烟東嶺歸嶺
外行人少天涯北客稀鷓鴣啼別處相對淚沾衣

六嘆

并序
選二首

五噫四愁九歌七啓皆創文者立意之終絕其
數而名之也清江白雲孤山遠嶼皆得時之人
吟咏性情耳余無暇於是焉窮居歲陰偶懷無
怍因追感聞見成文六篇目曰六嘆懼質文之
不備復何全於比興乎錄之私齋以示同道格
韻枯缺多慙見知

淡院梧桐夾金井上有轆轤青絲索美人清晝汲寒泉
寒泉欲上銀瓶落迢迢碧甃千餘尺竟日倚闌空嘆息
惆悵不來照明鏡却掩洞房花寂寂

綺幙香風翡翠車清明獨傍芙蓉渠上有雲鬟洞仙女
垂羅掩縠烟中語風月頻驚桃李時滄波久別鴛鴦侶
欲傳一札孤飛翼山長水遠無消息却鎖重門一院深
半夜空庭明月色

春山三竭來

釣魚竭來春日暖松溪不厭舟行緩野竹初栽碧玉長
澄潭欲下青絲短昔人避世兼避仇暮栖雲外身悠悠
我今無事亦如此赤鯉忽到長竿頭汎汎隨波凡幾里

碧莎如烟沙似砥瘦壁橫空怪石危山花鬪石禽爭水
有時帶月歸扣舷身閒自是漁家仙

山上搗來採新茗新花亂發前山頂瓊英動搖鐘乳碧
叢叢高下隨崖嶺未必蓬萊有仙藥能向鼎中雲漠漠
越甌遙見裂鼻香欲覺身輕騎白鶴

採藥搗來藥苗盛藥生只傍行人徑世人重耳不重目
指似藥苗心不足野客住山三十載妻兒共寄浮雲外
小男學語便分別已辨君臣知配匹都市廣長開大鋪
疾來求者多相悞見說韓康舊姓名識之不識先相怒

寄荆娘寫真

章華臺南莎草齊長河柳色連金堤青樓曛曩曙光蚤

梨花滿巷鶯新啼章臺玉顏年十六小來能唱西涼曲
教坊大使久知名郢上詞人歌不足少年才子心相許
夜夜高唐夢雲雨五銖香帔結同心三寸紅箋替傳語
緣池並戲雙鴛鴦田田翠葉紅蓮香百年恩愛兩相許
一日不見生愁腸上清仙女徵遊伴欲從湘靈住河漢
只愁陵谷變人寰空嘆桑田歸海岸願分精魄定形影
永似銀壺掛金井召得丹青絕世工寫真與身真相同
忽然相對兩不語疑是妝成來鏡中豈期人願天不違
雲輶却駐從山歸畫圖封裹寄箱篋洞房艷艷生光輝
良人翻作東飛翼却遣江頭問消息經年不得一封書
翠幕雲輶遶空壁結客有少年名總身姓江征帆三十

里前月發豫章知我別時言識我馬上郎恨無羽翼飛
使我徒怨滄浪長開篋取畫圖寄我形影與客將如今
憔悴不相似恐君重見生悲傷蒼梧九疑在何處斑斑
竹淚連瀟湘

近體詩

柳枝詞

錦池江上柳垂橋風引蟬聲送寂寥不必如絲千萬縷
只禁離恨兩三條

竹枝歌

十二山晴花盡開楚宮雙闕對陽臺細腰爭舞君王醉
白日秦兵江上來

竹裏

竹裏編茅倚石根竹莖疎處見前村閒眠盡日無人到
自有春風為掃門

題招隱寺即戴顓舊宅

兩崖古樹千般色一井寒泉數丈冰欲問前朝戴居士
野烟秋草是丘陵

過湖州妓宋態宜

曾識雲仙至小時芙蓉頭上綰青絲當時驚覺高唐夢
惟有而今宋玉知

陵陽夜會使君筵解語花枝出眼前一從明月西沉海
不見嫦娥二十年

紀事云涉至揚州一女子拜且泣問之曰態宜也故
吳興劉貞外全白之愛姬劉李有昔年之分因贈詩

李涉

贈夜客

暮雨蕭蕭江上村綠林豪客夜知聞他時不用相迴避

世上如今半是君

涉嘗過九江至皖口遇盜問何人從者曰李博士也其豪首曰若是李涉博士不用剽奪久聞詩名願題一篇

足矣涉遂題此絕贈之 范攄雲溪友議云李彙征常客遊閩越至循州冒雨求宿或指韋氏莊居韋氏杖履迎賓年八十餘自稱曰野人幸思明留之累夕談論諸家之作次及李涉主人酷稱善已而愀然變色曰老身弱齡不肖遊浪江湖為不平事後遇之蒙簡我詩感而改節隱此經今一紀矣李既云亡追惋持觴而醉與彙征各舉涉他詩十數篇而別去 乾符辛丑攄客雲川彙征所述也

晚泊潤州聞角

江城吹角水茫茫曲引邊聲怨思長驚起暮天沙上雁
海門斜去兩三行

御定全唐詩錄卷第六十八

御定全唐詩錄卷第六十九

禮部侍郎臣徐倬翰林院侍讀學士臣徐元正奉

旨校刊

李紳

紳字公垂亳州人與李文饒元微之齊名人號元
和三俊為人短小俗呼短李元和初補國子助教
累遷中書舍人武宗即位拜中書侍郎平章事
紀事云開成間紳集其詩為追昔遊蓋歎逝感時
發於悽恨而作也或長句或五言或雜言或歌或
吟或樂府齊梁不一其辭乃由牽思所屬爾赴梁
漢歸諫垣升翰苑感思遇歌帝京風物遭讒邪播

李紳

越歷荆楚涉湘沅逾嶺嶠抵荒陬止高要移九江
泛五湖過鍾陵沂荆江守滁陽轉壽春改賓客畱
洛陽歷會稽過梅里遭讒邪再為賓客分務歸東
周擢川守鎮大梁詞有所懷興生於怨故微顯不
常其言亦異

樂天贈紳詩云一篇長恨有風情十首秦吟近正
聲剛被老元偷格律苦教短李負歌行注云元九
往江陵余以詩一軸贈行自是格變李二十嘗自
負歌行近見余樂府五十首默然心伏

元微之和樂天東南行云李多嘲蝮蜓竇數集蝮
蛛注云李二十多詠物之作竇七頻改官銜屢有

蜘蛛之喜

樂天詩曰悶勸迂辛酒閑吟短李詩迂辛丘度
也丘度之子一日自云辛氏子來見紳曰小子每
憶白二十二丈詩悶勸疇昔酒閒吟二十丈詩紳
笑曰辛大有此狂兒吾敢不存舊

古體詩

憫農詩

春種一粒粟秋收萬顆子四海無閑田農夫猶餓死鋤
禾日當午汗滴禾下土誰知盤中飧粒粒皆辛苦紳初以古風求

知于呂溫溫見其憫農詩曰
此人必為宰相果如其言

移九江

秋波入白水帆去侵空小五兩劇奔星檣烏疾飛鳥溢
城依落日湓浦看雲眇雲眇更蒼蒼匡山低夕陽楚客
喜風水秦人悲異鄉異鄉秋思苦江臯月華吐漾漾隱
波亭悠悠通月浦津橋歸候吏竹巷開門戶容膝有匡
牀及肩纜數堵隙光非白駒懸磬我無虞體瘦寡行立
家肥安啜哺天書憐譴謫重作朱轡客四座眼全青一
麾頭半白今來思往事往事益悽然風月同今昔悲歡
異目前四時嗟閱水一紀換流年獨有西庭鶴孤鳴白
露天

上家山

余頃居梅里常于惠山肄業舊室猶
在垂白重遊追感多思因效吳均體

上家山家山依舊好昔去松桂長今來容鬢老上家山

臨古道高低入雲樹蕪沒連天草草色綠萋萋寒蛩徧
草啼噪鴉啼樹遠行鴈帖雲齊岳光翻落日僧火開經
室竹洞磬聲長松樓鐘韻疾苔堦泉溜缺石甃青莎密
舊徑行處迷前交坐中失歎息整華冠持杯強自歡笑
歌憐稚孺絃竹縱吹彈山明溪月上酒滿心聊放髻髮
此淹畱垂絲匪閑曠青山不可上昔事還惆悵况復白
頭人追懷空望望

憶東郭居

效丘
遲

昔余過稚齒從師昧知與徒懷利物心不獲藏身寶曳
妻一縫掖出處勞昏早醒醉迷啜哺衣裳辨顛倒忠誠
貫白日直已憑蒼昊卷舌隋讒諛驚波息行潦衰禽識

舊木疲馬知歸道楊柳長庭柯蘭荃覆堦草旌旄光里
舍騎服歡妻嫂綠髻絕新知蒼鬢稀舊老冠綏身忝貴
齋沐心常禱笙磬諒諧和庭除還灑掃栖遲還竹巷物
役侵江島倏忽變星霜悲傷滿懷抱

南梁行

江城鬱鬱春草長悠悠漢水浮青光雜英飛盡空晝景
綠楊重陰官舍靜此時醉客縱橫書公言可薦承明廬
青天詔下寵光至頒籍金閨徵石渠梯歸山路煙嵐隔
山木幽溪晚花拆澗底紅光奪火燃搖風扇毒愁行客
杜鵑啼咽花亦殷聲悲絕艷連空山斜陽瞥映淺溪樹
雲雨翻迷岨谷間山雞錦質矜毛羽透竹穿蘿命儔侶

喬木幽谿上下同雄雌不惑飛棲處望秦峯迥過商顏
浪疊雲堆萬簇山行盡杳冥青嶂外九重鐘漏紫霄間
元和列侍明光殿諫草初焚市朝變北闕趨承半隙塵
南梁嘯咏皆飛霰追思感歎却昏迷霜髻愁吟到曉雞
故篋歲深開斷簡秋堂月曙掩遺題嗚嗚曉角霞輝粲
撫劍當楹一長歎菟狗無由學聖賢空持感激終昏旦

過荆門

荆江水濶煙波轉荆門路遶山葱蒨帆勢侵雲滅又明
山程背日昏還見青青麥隴啼飛鴉寂寞野徑棠梨花
行行驅馬萬里遠漸入煙嵐危棧賒林中有鳥飛出谷
月上千巘一聲哭腸斷思歸不可聞人言恨魄來巴蜀

我聽此鳥祝我魂魂死勿學聲銜冤縱為羽族莫棲息
直上青雲呼帝闈此時山月如銜鏡岳樹參差互輝映
皎潔溪看入澗泉分明細見樵人徑陰森鬼廟當郵亭
雞豚日宰聞羶腥愚夫禍福自迷惑魍魎憑何通百靈
月低山曉問行客已醉椒漿拜荒陌惆悵忠貞徒自持
誰祭山頭望夫石

涉沅瀟

屈原死處瀟湘陰滄浪淼淼雲沉沉蛟龍長怒虎長嘯
山木脩脩波浪深烟橫日落驚鴻起山映餘霞杳千里
鴻叫離離入暮天霞消漠漠深雲水水虛江暗揚波濤
鼉鼉動盪風騷騷行人愁望待明月星漢沈浮魍鬼號

屈原爾為懷王沒水府通天化靈物何不驅雷擊電除
奸邪可憐空作沉泉抱冤骨舉杯瀝酒招爾魂月影滉
漾開乾坤波明水黑山隱見汨羅之上遙昏昏風帆候
曉看五兩戍鼓鼙鼙遠山響潮滿江津猿鳥啼荆夫楚
語飛蠻檠瀟湘島浦無人居風驚水暗惟鮫魚行來擊
棹獨長歎問爾精魂何所如

逾嶺嶠止荒陬抵高要

天將南北分寒燠北被羔裘南卉服寒氣凝為戎鹵驕
炎蒸結作蟲虺毒周王止化惟荆蠻漢武鑿遠通孱顏
南標銅柱限荒徼五嶺從茲窮險艱衡山截斷炎方北
迴雁峯南瘴煙黑萬壑奔湯溢作瀧湍飛浪激如繩直

千崖俯聳猿嘯悲丹蛇元虺潛蛟螭瀧夫擬檝劈高浪
瞥忽浮沉如電隨嶺頭刺竹蒙籠密火拆紅蕉焰燒日
嶺上泉分南北流行人照水愁傷骨陰森石路盤紫紆
雨寒日燠常斯須瘴雲暫卷火山外蒼茫海氣窮番禺
鷓鴣猿鳥聲相續椎髻曉呼同戚促百處谿灘異雨晴
四時雷電迷昏旭魚腸雁足望緘封地遠三江嶺萬重
魚躍豈通清遠峽雁飛難渡瘴江東雲蒸地熱無霜霰
莖李冬華匪時變天際長垂飲澗虹簷前不去銜泥燕
幸逢雷雨盪妖昏提挈悲歡出海門西日眼明看少長
北風身醒辨寒溫賈生謫去因前席痛哭書成竟何益
物忌忠良表是非朝驅絳灌為讐敵明皇聖德異文皇

不使無辜困鬼方漢日傅臣終委棄如今衰叟重輝光
高明白日恩深海齒髮雖殘壯心在空媿駑駘異一毫
無令朽骨慙千載

悲善才

并序

余守郡日有客遊者善彈琵琶問其所傳乃善
才所授頃在內庭日別承恩顧賜宴曲江勅善
才等二十人備樂自余經播遷善才已歿因追
感前事為悲善才此一篇在郡日所為今編於

新錄

穆皇夜幸蓬池曲金鑾殿開高秉燭東頭弟子曹善才
琵琶請奏新翻曲翠蛾列坐層城女笙笛參差齊笑語

李紳

李紳

天顏靜聽朱絲彈衆樂寂然無敢舉銜花金鳳當承撥
轉腕攏絃促揮抹扶花翻鳳天上來徘徊滿殿飛春雪
抽絃度曲新聲發金鈴玉珮相嗟切流鶯子母飛上林
仙鶴雌雄唳明月此時奉詔侍金鑾別殿承恩許召看
三月曲江春草綠九霄天樂下雲端紫髯供奉前屈膝
盡彈妙曲當春日寒泉注射隴水開塞雁翻飛朔天沒
日曛塵暗車馬散為惜新聲有餘歎明年冠劍閉橋山
萬里孤臣投海畔籠禽鍛翮尚還飛白首生從五嶺歸
聞道善才成朽骨空餘弟子奉宣徽南譙寂寞三春晚
有客彈絃獨淒怨靜聽深奏楚明光憶昔初聞曲江宴
心悲不覺淚闌干更為調絃反覆彈秋吹動搖神女佩

月珠敲擊水晶盤自憐淮海同泥滓恨魄癡心未能死
惆悵追懷萬事空雍門琴感徒為爾

近體詩

趨翰苑遭誣構四十六韻

九五當乾德三千應瑞符纂堯昌聖曆宗禹盛不圖畫
象垂新令消兵易舊謨選賢方去智招諫忽升愚大樂
調元氣神功運化鑪脫鱗趨沆漑翻翼集蓬壺捧日恩
光別抽毫顧問殊鳳形憐彩筆龍領借驪珠擲地聲名
寡摩天羽翮孤潔身酬雨露利口扇讒訣碧海同宸眷
鴻毛比賤軀辨疑分黑白舉直觝朋徒庭獸方呈角階
莫始効葦日傾烏掩魄星落斗摧樞墜劍悲喬岳號弓

泣鼎湖亂羣逢害馬擇肉縱狂貙膽為隳肝竭心因瀝
血枯滿帆推駭浪征棹折危途燕客書方詐堯門信未
孚詢與金就鑠毀極玉生瘡礪吻矜先搏張羅騁疾驅
地嫌稀魍魎海恨止番禺瘴嶺衝蛇入蒸池躡虺趨望
天收雪涕看鏡攬霜鬚草毒人驚剪茅荒室未誅火風
晴處扇山鬼雨中呼窮老鄉關遠羈愁骨肉無鵲靈窺
戶牖龜瑞出泥途煙島淡千瘴滄波淼四隅海標傳信
使江棹認妻孥到接三冬暮來經六月徂暗灘朝不怒
驚瀨夜無虞俛首安羸業齊眉慰病夫涸魚思雨潤僵
燕望雷蘇詔下因頒朔恩移詎省辜誑天猶指鹿依社
尚憑狐度嶺瞻牛斗浮江淬轆轤未平人睚眦誰懼鬼

柳榆溢浦潮通楚匡山地接吳庾樓清桂滿遠寺碧蓮
敷髣髴皆停馬悲歡盡隙駒舊交封宿草衰髻重生芻
萬戟分梁苑雙旌寄魯儒駸駸移歲月冉冉近桑榆疲
馬愁千里孤鴻念五湖終當賦歸去那更學楊朱

過吳門二十四韻

煙水吳都郭閭門架碧流綠楊淡淺巷青翰往來舟朱
戶千家室丹楹百處樓水光搖極浦草色辨長洲憶作
麻衣客曾為旅棹遊放歌隨楚老清宴奉諸侯花寺聽
鶯入春湖看雁畱里吟傳綺唱鄉語認飲謳橋轉攢虹
飲波通鬪鷁浮竹扉梅圃靜水檻橘園幽縫堵荒麋苑
穿巖破虎丘舊風猶越鼓餘俗尚吳鈞故館曾閑訪遺

踪亦徧搜吹臺山木盡香徑佛宮秋帳殿菰蒲掩雲房
霧露收苧蘿妖覆滅荆棘鬼包羞風月俄黃綬經過半
白頭重來冠蓋客非復別離愁候火分通陌前旌駐外
郵水風搖綵旆堤柳引鳴騶問吏兒孫隔呼名禮敬修
顧瞻殊夙昔語默過悲憂義感心空在容衰日易偷還
持滄海詔從此布皇猷

憶春日太液池東亭候對

宮鶯曉報瑞煙開三島靈禽拂水迴橋轉彩虹當綺殿
艦浮花鷁近蓬萊草承香輦王孫長桃艷仙顏阿母栽
簪筆此時方侍從却思金馬笑鄒枚

憶夜直金鑾殿承旨

月當銀漢玉繩低淡聽簫韶碧落齊門壓紫垣高綺樹
閣連青瑣近丹梯墨宣外渥催飛詔草定新恩促換題
明日獨歸花路遠可憐人世隔雲霓

憶春日曲江宴後許至芙蓉園

春風上苑開桃李詔許看花入御園香徑草中迴玉勒
鳳凰池畔泛金樽綠絲垂柳遮風暗紅藥低叢拂砌繁
歸繞曲江煙景晚未央明月鎖千門

新昌宅書堂前有藥樹一枝今已盈拱長慶中於

翰林院內西軒藥樹下移得纔長一寸僕夫封

一泥丸以歸植今則長成名之天上樹

白榆星底開紅甲珠樹宮中長紫梢丹彩結心纔辨質

碧姿抽葉乍舒條羽衣道士偷懸圃金簡真人護玉苗
長帶九天餘雨露近來葱翠欲成喬

滁陽春日懷果園開宴

西園到日栽桃李紅白低枝拂酒杯繁艷只愁風處落
醉筵多就月中開勸人莫折憐芳早把燭頻看畏曉催
聞道數年淡草露幾株猶得近池臺

七年初到洛陽寓居宣教里時已春暮而四老俱

在洛中分司

青莎滿地無三徑白髮緣頭忝四人官職謬齊商嶺客
姓名那重漢廷臣聖朝寡罪容衰齒愚叟多慙未退身
惟有門人憐鈍拙勸教沉醉洛陽春

憶至鞏縣河宿待家累追懷

鞏樹翻紅秋日斜水分伊洛照餘霞弓開後騎低初月
鶚駐前旌拂暮鴉閨信坐遲青玉案弄兒閑望白羊車
今來憶事涼風晚烟浦空悲黃菊花

宿揚州

江橫渡濶烟波晚潮過金陵落葉秋嘹唳塞鴻經楚澤
淺淡紅樹見揚州夜橋燈火連星漢水郭帆檣近斗牛
今日市朝風俗變不須開口問迷樓

憶題惠山寺書堂

故山一別光陰改秋露春風歲月多松下壯心年少去
池邊衰影老人過白雲生滅依巖岫青桂榮枯託薜蘿

惟有此身長是客又驅旌旆寄煙波

江南暮春寄家

洛陽城見迎梅雪魚口橋逢送雪梅劍外寺前芳草合
鏡湖亭上野花開江鴻斷續翻雲去海燕差池拂水迴
料得心知近寒食潛聽喜鵲望歸來

建元寺

并序

寺在常州東郭松扉竹院各在岡阜地甚疎通
接郊外每歲寒食里人灑掃經過之所大曆中
詩人郭鄖曾賦寒食詩贈吏部先兄詩云蘭陵
士女滿晴川郊外紛紛拜古堦萬井人家初禁
火九原松柏自生煙人間後事非前事鏡裏今

年老去年介子終知祿不及王孫誰復更相憐
當時以為絕唱嘗在兒童即聞此詩非欲繼和

蓋紀事因書

江城物候傷心地遠寺經過禁火辰芳草壠邊迴首客
野花叢裏斷腸人紫荊繁艷空門晝紅藥淡開古殿春
歎息光陰催白髮莫悲風月獨沾巾

却到無錫望芙蓉湖

丹橘村邊燭火微碧流明處雁初飛蕭條落葉垂楊岸
隔水寥寥聞擣衣

施肩吾

肩吾字希聖睦州人元和十年登進士第慕仙跡

隱豫章西山為詩奇麗有西山集

自序云二十年辛苦煙蘿松月之下或時學龜息
飲而不食腸胃無滓形神益清見天地六合之奧
凡奇兆異狀閱乎心目者銳思一搜皆落我文字
網中

晁公武曰肩吾以西山乃十二真仙羽化之所心
慕之因卜隱有詩云若數西山得道者連予便是
十三人

古體詩

效古體

黃金無舊釵綺縵無舊裾惟有一寸心長貯萬里夫南

軒夜蟲織已促北牖飛蛾遶殘燭祇言衆口鑠千金誰
信獨愁銷片玉不知歲晚歸不歸又將淚眼縫征衣

夜宴詞

蘭缸如晝買不眠玉堂夜起沉香煙青娥一行十二仙
欲笑不笑桃花然碧窓弄嬌妝洗晚戶外不知銀漢轉
被郎嗔罰琉璃盞酒入四肢紅玉軟

近體詩

代征婦怨

寒窗羞見影相隨嫁得五陵輕薄兒長短艷歌君不解
淺深更漏妾偏知畫裙多淚鴛鴦濕雲髻慵梳玳瑁垂
何事不看霜雪裏堅貞惟有古松枝

贈邊將

輕生奉國不為難，戰苦身多舊箭瘢。
玉匣鎖龍鱗甲冷，金鈴襯鵲羽毛寒。
皂貂擁出花當背，白馬騎來月在鞍。
猶恐羌戎臨塞下，桺營特把陣圖看。

送人南遊

見說南遊偏不易，中途莫忘寄書頻。
凌空瘴氣隨飛鳥，解語山魃惱病人。
閩縣綠蛾能引客，泉州烏藥好防身。
異花奇草分明看，待汝歸來盡取真。

古相思

十訪九不見，甚於菖蒲花。可憐雲中月，今夜墮我家。

湘竹詞

萬古湘江竹，無窮奈怨何。年年長春筍，只是淚痕多。

幼女詞

幼女纔六歲，未知巧與拙。向夜在堂前，學人拜新月。

宿南一上人山房

窓牖月色多，坐卧禪心靜。青鬼來試人，夜深弄燈影。

蘭渚泊

家在洞水西，身作蘭渚客。天晝無纖雲，獨坐空江碧。

少年行

醉騎白馬走空衢，惡少皆稱電不如。
五鳳街頭聞勒轡，半垂衫袖揖金吾。

春詞

一作沈亞之詩，稍有不同。

黃鳥啼多春日高
紅芳開盡井邊桃
美人手暖裁衣易
片片輕雲落剪刀

仙翁詞

世間無遠可為遊
六合朝行夕已周
壇上夜深風雨靜
小仙乘月繫蒼虬

望夫詞

看看北雁又南飛
薄倖征夫久不歸
蟾子到頭無信處
凡經幾度上人衣
手熱寒燈向影頻
迴文機上暗生塵
自家夫壻無消息
却恨橋頭賣卜人

少女詞

同心帶裏脫金錢
買取頭花翠羽連
手執木蘭猶未慣
今朝初上採菱船

少婦遊春詞

簇錦攢花鬪勝遊
萬人行處最風流
無端自向春園裏
笑摘青梅叫阿侯

夜笛詞

皎潔西樓月未斜
笛聲寥亮入東家
却令燈下裁衣婦
誤剪同心一片花

惜花詞

千樹繁紅繞碧泉
正宜尊酒對芳年
明朝欲飲還來此
只怕春風却在前

山居樂

鸞鶴每於松下見，笙歌常向坐中聞。
手持十節龍頭杖，不指虛空即指雲。

冬日觀早朝

紫煙捧日爐香動，萬馬千車踏新凍。
繡衣年少朝欲歸，美人猶在青樓夢。

春霽

煎茶水裏花千片，候客亭中酒一樽。
獨對春光還寂寞，羅浮道士忽敲門。

秋夜山居

幽居正想食霞客，夜久月寒珠露滴。
千年獨鶴兩三聲。

飛下巖前一枝柏

去雁聲遙人語絕，誰家素機織新雪。
秋山野客醉醒時，百尺老松銜半月。

春日錢唐雜興

仙姥溪頭桑裊裊，錢唐郭外柳毵毵。
路逢隣婦遙相問，小小如今學養蠶。

西隣年少問東隣，柳岬花堤幾處新。
昨夜雨多春水潤，隔江桃葉喚何人。

下第春遊

羈情含縠復含辛，淚眼看花只似塵。
天遣春風領春色，不教分付與愁人。

與諸隱者夜登四明山

半夜尋幽上四明手攀松桂觸雲行
相呼已到無人境何處玉簫吹一聲

宿四明山

黎洲老人命余宿杳然高頂浮雲平
下視不知幾千仞欲曉不曉天雞聲

春日宴徐君池亭

暫憑春酒換愁顏今日應須醉始還
池上有門君莫掩從教野客見青山

題禪僧院

棲禪枝畔數花新飛作琉璃地上塵
谷鳥自啼猿自叫

不能愁得定中人

遇王山人

每欲尋君千萬峯豈知人世也相逢
一瓢遺却在何處應挂天台最老松

山中得劉秀才京書

自笑家貧客到疎滿庭煙草不能鋤
今朝誰料三千里忽到劉京一紙書

誚山中叟

老人今年八十幾口中零落殘牙齒
天陰偃僂帶嗽行猶向巖前種松子

贈採藥叟

老去惟將藥裹行無家無累一身輕却教年少取書卷
小字鐙前鬪眼明

贈女道士鄭玉華

元髮新簪碧藕花欲添肌雪餌紅砂世間風景那堪戀
長笑劉郎漫憶家

明鏡湖中休採蓮却師阿母學神仙朱絲誤落青囊裏
猶是篁篔第幾絃

寄王少府

採松仙子徒銷日喫菜山僧在過生多謝藍田王少府
人間詩酒最關情

秋夜山中別友人

何處邀君話別情寒山木落月華清莫愁今夜無詩思
已聽秋猿第一聲

山中送友人

欲折楊柳別恨生一重枝上一啼鶯亂山重叠雲相掩
君向亂山何處行

送絕粒僧

碧洞青蘿不畏深免將饑渴累人心若期野客來相訪
一室無烟何處尋

望騎馬郎

碧蹄新壓步初成玉色郎君弄影行賺殺唱歌樓上女
伊州誤作石州聲

佳人覽鏡

每坐臺前見玉容今朝不與昨朝同良人一夜出門宿
減却桃花一半紅

折楊柳

傷見路傍楊柳春一株折盡一重新今年還折去年處
不送去年離別人

翫友人庭竹

曾去元洲看種玉那似君家滿庭竹客來不用呼清風
此處掛冠涼自足

戲咏榆莢

風吹榆錢落如雨繞林繞屋來不住知爾不堪還酒家

漫教夷甫無行處

蜀茗詞

越椀初盛蜀茗新薄煙輕處攬來勻山僧問我將何比
欲道瓊漿却畏嗔

殷堯藩

堯藩蘇州嘉興人元和中登進士第辟李翔長沙
幕府加授監察御史又嘗辟同州從事又為永樂
令

近體詩

吳宮

吳王愛歌舞夜夜見嬋娟見日吹紅燭和塵拂翠鈿徒

令勾踐霸不信子胥賢莫問長洲草荒涼無限年

過友人幽居

身坐衆香國蒲團詩思新一貧曾累我此興未輸人陋巷誰爲俗寒窗不染塵石齋盟四友岩下頓生春

遊王羽士山房

落日半樓明琳宮事事清山橫萬古色鶴帶九臯聲易作神仙侶難忘父子情道人應識我未肯說長生

上巳日贈都上人

三月初三日千家與萬家蝶飛秦地草鶯入漢宮花鞍馬皆爭麗笙歌盡鬪奢吾師無所願惟願老煙霞曲水公卿宴香塵盡滿街無心修禊事獨步到禪齋細

草縈愁目繁花逆旅懷綺羅人走馬遺落鳳皇釵

送沈亞之尉南康

行邁南康路客心離怨多暮煙葵葉屋秋月竹枝歌孤鶴唳殘夢驚猿嘯薜蘿對江翹首望愁淚疊如波

送客遊吳

吳國水中央波濤白沙茫衣逢梅雨漬船入稻花香海戍通鹽竈山村帶蜜房欲知蘇小小君試到錢唐

中元日觀諸道士步虛

元都開秘籙白石禮先生上界秋光淨中元夜氣清星辰朝帝處鸞鶴步虛聲玉樹花難老珠宮月最明掃壇天地肅投簡鬼神驚倘賜刀圭藥還留不死名

醉贈劉十二一作寄嶺南張明府
春草正萋萋知君過惡溪鶯將吉了語猿共裸然啼別
路魂先斷還家夢幾迷定尋雷令劍應識越王笄樹色
多於北潮聲少向西柳花好為酒誰伴醉如泥

帝京

列郡徵才起俊髦萬機獨使聖躬勞開藩上相頒龍節
破虜將軍展豹韜地入皇圖三輔壯天垂華蓋七星高
迎春別賜瑤池宴捧進金盤五色桃
龍虎山河御氣通遙瞻帝闕五雲紅英雄盡入江東籍
將相多收薊北功禮樂日稽三代盛梯航歲貢萬方同
都將儉德熙文治淳俗應還太古風

宮詞

悄悄深宮不見人倚欄惟見石麒麟芙蓉帳冷愁長夜
翡翠簾垂隔小春天遠難通青鳥信風寒欲動錦花茵
夜深怕有羊車過自起籠燈看雪紋

郊居作

碧樹濃陰護短垣蒼江春暖渚鳧喧買魚試喚鳴榔艇
尋鶴因行隔隴邨生理何憑文是業世情縱遣酒盈樽
相逢謂我迂疎甚欲辨還憎恐失言

旅行

煙樹寒林半有無野人行李更蕭疎埃長埃短逢官馬
山北山南聞鷓鴣萬里關河成傳舍五更風雨憶呼盧

寂寥一點寒燈在酒熟隣家許夜沽

還京口

黃鶴山頭雪未消行人歸計在今朝城圍鐵甕江山壯
地接金陵草木彫北府市樓聞舊酒南橋官柳識歸橈
吏民莫見參軍面水宿風餐鬢髮焦

潭州獨步

鶴髮垂肩懶著巾晚涼獨步楚江濱一帆暝色鷗邊雨
數尺筇枝物外身習巧未逢醫拙手聞歌先識採蓮人
笑看斥鷃飛翔去樂處蒿萊便有春

訪許渾

去郭來尋隱者居柳陰假步小籃輿每期會面初償約

却計論心舊得書淺綠垣牆綿薜荔淡紅池沼映芙蓉
為言官共畱連飲澗有青芹罟有魚

送劉禹錫侍御出刺連州

遐荒迢遞五羊城歸興濃消客裏情家近似忘山路險
土甘殊覺瘴烟輕梅花清入羅浮夢荔子紅分廣海程
此去定知償隱趣石田春雨讀書耕

送景元上人還山

嵩陽聽罷講經鐘遠訪庭闈錫度空蒲履謾從歸後織
衲衣猶記別時縫地橫龍朔連沙溟山入烏桓碧樹重
梵宇傳來金貝葉花前拜捧慰親容

偶題

越女收龍眼蠻兒拾象牙長安千萬里走馬送誰家

春怨

柳花撲簾春欲盡綠陰障林鶯亂啼祇愁明日送春去
落日滿園啼竹雞

同州端午

鶴髮垂肩又許長離家三十五端陽兒童見說深驚訝
却問何方是故鄉

遊山南寺

山中盡日無人到竹外交加百鳥鳴昨日小樓微雨過
櫻桃花落晚風晴

潭州席上贈舞柘枝妓

姑蘇太守青娥女流落長沙舞柘枝滿座繡衣皆不識

可憐紅臉淚雙垂

雲溪友議云李翔在潭州席上有舞柘枝者顏色憂悴
堯藩識之當筵贈詩云云翔詰其事乃故蘇臺韋中丞

愛姬所生之女也曰妾以昆弟天喪委身樂部恥辱先人言訖涕咽情不能堪亞
相為之吁嘆且曰吾韋族姻舊連命更其舞服飾以袿襦延與夫人相見顧其言
語清楚宛有冠蓋風儀遂
於賓榻中選士而嫁之

御定全唐詩錄卷第六十九

御定全唐詩錄卷第七十

禮部侍郎臣徐倬翰林院侍讀學士臣徐元正奉

旨校刊

張祜

祜字承吉清河人初以宮詞得名五言詩善題目
佳境言不可刊置他處長慶中令狐楚表薦之不
報辟諸侯府多不合自劾去嘗客淮南杜牧溪重
之愛丹陽曲阿地築室卜隱性嗜水石悉力致之
不畜田產為身後計

雲溪友議云祜初與徐凝同赴白居易杭州求解
白試之以凝居首而次祜祜不服自述佳句及觀

張祜

獵宮詞二首白云君獵詩欲以較王右丞乎宮詞
四句中皆數對何足奇因太息歸自此罷舉又云
祐長慶中深為令狐楚所知楚鎮天平自草薦表
令以詩三百篇隨狀表進祐至京屬元稹在內庭
上問之稹曰祐雕蟲小技壯夫不為或獎激之恐
變陛下風教上領之於是失意東歸有孟浩然身
更不疑之句又云杜牧嘗論元白詩體舛雜因茲
有恨守秋浦與祐為詩酒交以白有非祐之論頗
不平之有詩云誰人得似張公子一首詩輕萬戶
侯又云如何故國三千里虛唱歌詞滿六宮欲異
於元白以曲成祐焉

祐今多誤作祐祐有子望虔為冬瓜堰官祐自謹
冬瓜合出瓠子事見太平廣記此名祐之証

古體詩

西江行

日下西塞山南來洞庭客晴空一鳥渡萬里秋江碧惆
悵異鄉人無言空脉脉

送蜀客

楚客去岷江西南指天末平生不達意萬里船一發行
行三峽夜十二峯頂月哀猿別會林忽忽聲斷咽嘉陵
水初漲巖嶺耗積雪不妨高唐雲却藉宋玉說峨眉遠
凝黛脚底谷洞穴錦城晝氤氳錦水春活活成都滯遊

地酒客須醉殺莫戀卓家壚相如已屑屑

車遥遥

東方曨曨車軋軋地色不分新去轍閨門半掩床半空
斑斑枕花殘淚紅君心若車千萬轉妾身如轍移漸遠
碧川棲棲山宛宛馬蹄在耳輪在眼桑間女兒情不淺
莫道野蠶能作繭

近體詩

吳宮曲

日下苑西宮花開香徑紅玉釵斜白燕羅帶弄青蟲皓
齒初含雪柔枝欲斷風可憐傾國艷誰信女為戎

公子行

春色滿城池盃盤着處移鎧金斜雁子鞍帕嫩鶯兒買
笑歌桃葉尋歡折柳枝可憐明月夜長是管絃隨

塞上曲

邊風捲地時日暮帳初移磧迥三通角山寒一點旗連
收搦索馬引滿射雕兒莫道功勳細將軍昔戍師

塞下曲

二十逐嫖姚分兵遠戍遼雪迷經塞夜冰壯渡河朝促
放鵬難下生騎馬未調小儒何足問看取劍橫腰

塞下

萬里配長征連年慣野營入群來揀馬拋伴去擒生箭
插鷗翎濶弓盤鵲角輕閑看行近遠西去受降城

秋霽

垂老歸休意栖栖陋巷中暗燈棋子落殘語酒瓶空滴
幕侵簷露虛疎入檻風何妨一蟬嘒自抱木蘭叢

晚夏歸別業

古岬扁舟晚荒園一徑微鳥啼新果熟花落故人稀宿
潤侵苔甃斜陽照竹扉相逢盡鄉老無復話時機

憶雲陽宅

一別雲陽宅深愁度歲華翠濃春檻柳紅滿夜庭花鳥
影垂纖竹魚行踐淺沙聊當因寤寐歸思浩無涯

江城晚眺

重檻構雲端江城四鬱盤河流出郭靜山色對樓寒浪

草侵天白霜林映日丹悠然此江思樹杪幾檣竿

江西道中

日落江村遠烟雲度幾重問人孤驛路驅馬亂山峯夜
入霜林火寒生水寺鐘淒涼哭途意行處又饑凶
西江江上月遠遠照征衣夜色草中網秋聲林外機渚
田牛路熟石岸客船稀無復是鄉井鷓鴣聊自飛
秋灘一望平遠遠見山城落日懸烏柏空林露寄生燒
畬殘火色盪槩夜溪聲况是曾游處荒田小變更

夕次桐廬

百里清溪口扁舟此去過晚潮風勢急寒葉雨聲多戍
出山頭鼓樵通竹裏歌不堪無酒夜回首夢烟波

松汀驛

山色遠含空蒼茫澤國東海明先見日江白迥聞風鳥
道高原去人煙小徑通那知舊遺逸不在五湖中

洞庭南館

一徑逗霜林朱欄遶碧岑地盤雲夢角山鎮洞庭心樹
白看烟起沙紅見日沈還因此悲屈惆悵又行吟

入潼關

都城三百里雄險此迴環地勢遙尊嶽河流側讓關秦
皇曾虎視漢祖昔龍顏何事梟克輩干戈自不閒

登廣武原

廣武原西北華夷此浩然地盤山入海河遶郭連天遠

樹千門色高橋萬里舩鄉心日云暮猶在楚城邊

題海鹽南館

故人營此地臺館尚依依黑夜山魃語黃昏海燕歸舊
陰楊葉在殘雨槿花稀無復南宮賞高簷紅燭輝

題曾氏園林

十畝長堤宅蕭疎半老槐醉眠風卷簾棋罷月移堦斫
樹遺桑斧澆花濕笋鞋還將齊物論終歲自安排

題杭州孤山寺

樓臺聳碧岑一徑入湖心不雨山長潤無雲水自陰斷
橋荒蘚澀空院落花淡猶憶西窗月鐘聲在北林

潤州甘露寺

千重構橫險高步出塵埃日月光先到江山勢盡來冷
雲虛水石清露滴樓臺况是東溟上平生意一開

金山寺

一宿金山頂微茫水國分僧歸夜船月龍出曉堂雲樹
影中流見鐘聲兩岸聞因悲在朝市終日醉醺醺

禪智寺

寶殿依山險臨虛勢若吞畫簷齊木末香砌壓雲根遠
景窓中岫孤烟竹裏村憑高聊一望鄉思隔吳門

喜王子載話舊

相逢青眼日相嘆白頭時累話三朝事重看一局棋歡
娛非老大成長是嬰兒且盡罇中物無煩更後期

途中逢李道實游蔡州

征馬漢江頭逢君上蔡游野橋經亥市山路過申州僻
地人行澀荒林虎跡稠殷勤話新守生物賴諸侯

訪許用晦

遠郭日曛曛停橈一訪君小橋通野水高樹入江雲酒
興曾無敵詩情舊逸群恠來音信少五十我無聞

送韋整尉長沙

遠道長沙去憐君屈一官風帆彭蠡疾雲水洞庭寬木
客提蔬束江烏接飯丸莫言卑濕地未必乏新歡

送沈下賢謫尉南康

秋風江上草先是客心摧萬里故人去一行新雁來山

高雲緒斷浦迥日波顏莫怪南康遠相思不可裁

殘獵

殘獵渭城東蕭蕭西北風雪花鷹背上冰片馬蹄中臂
挂梢荆兔腰懸落箭鴻歸來逞餘勇兒子亂彎弓

題杭州天竺寺

西南山最勝一界是諸天上路穿巘竹分流入寺泉躡
雲丹井畔望月石橋邊洞壑江聲遠樓臺海氣連塔明
春嶺雪鐘散暮松烟何處去猶恨更看峯頂蓮

公子行

玉堂前後畫簾垂立却花驄待出時紅粉美人擎酒勸
錦衣年少臂鷹隨輕將玉板敲花片旋把金鞭約柳絲

晴日獨游三五騎等閒行傍曲江池

夢妾換馬

一面天桃千里蹄嬌姿駿骨價應齊乍牽玉勒辭金棧
催整花鈿出繡閨去日豈無沾袂泣歸時還有頓銜嘶
嬋娟躑躅春風裏揮手搖鞭楊柳堤
綺閣香銷華廐空忍將行雨換追風休憐柳葉雙眉翠
却夢桃花兩耳紅侍讌永辭春色裏趨朝休立漏聲中
恩勞未盡情先盡暗泣長嘶兩意同

題干越亭

扁舟亭下駐煙波十五年遊重此過洲背露沙人渡淺
樹梢藏竹鳥啼多層欄漲水痕猶在古板題詩字已訛

况是高秋正圓月可堪聞唱異鄉歌

秋夜登潤州慈和寺上方

清夜浮埃歇井廓塔輪全照露華鮮人行中路月生海
鶴語上方星滿天樓影半連溪岸水鐘聲寒徹遠林烟
僧房閉盡下樓去一半夢魂離世緣

和杜牧之齊山登高

秋溪南岸菊霏霏急管繁絃對落暉紅葉樹深山逕斷
碧雲江淨浦帆稀不堪孫盛嘲時笑願送王弘醉夜歸
流落正憐芳草在砧聲徒促授寒衣

寓懷寄蘇州劉郎中

一聞周召佐明時西望都門強策羸天子好文才自薄

諸侯力薦命猶奇賀知章口徒勞說孟浩然身更不疑
唯是勝游行未徧欲離京國尚遲遲

感王將軍柘枝妓歿

寂寞春風舊柘枝美人休舞曲停吹鴛鴦鈿帶拋何處
孔雀羅衫付阿誰畫鼓不聞招節拍錦靴空想挫腰肢
今來座上翻如醉曾見梨園教徹時

宮詞

故國三千里深宮二十年一聲河滿子雙淚落君前此詩

傳入宮禁杜牧酬祐詩云七子論詩誰似公曹劉
須在指揮中可憐故國三千里虛唱歌辭滿六宮

自倚能歌日先皇掌上憐新聲何處唱腸斷李延年

白鼻騮

爲底胡姬酒長來白鼻騮摘蓮拋水上郎意在浮花

蘇小歌

新人千里去故人千里來剪刀橫眼底方覺淚難裁

牆頭花

蟋蟀鳴洞房梧桐落金井爲君裁舞衣天寒剪刀冷

穆護沙

玉管朝朝弄清歌日日新折花當驛路寄與隴頭人

金殿樂

入夜秋砧動千聲起四隣不緣樓上月應爲隴頭人

長門怨

日映宮牆柳色寒笙歌遙指碧雲端珠鉛滴盡無心語

強把花枝冷笑着

鄴中懷古

鄴中城下漳河水日夜東流莫記春腸斷宮中望陵處
不堪臺上也無人

寧哥來

日映宮城霧半開太真簾下畏人猜黃翻綽指向西樹
不信寧哥回馬來

阿鵠湯

月照宮城紅樹芳綠窓燈影在雕梁金輿未到長生殿
妃子偷尋阿鵠湯

邠王小管

虢國潛行韓國隨宜春深院映花枝金輿遠幸無人見
偷把邠王小管吹

邠娘羯鼓

新教邠娘羯鼓成大酺初日最先呈冬兒指向真真說
一曲乾鳴杖子輕

海錄雜事云明皇宮中有容兒弄鉢頭邠娘
羯鼓要娘歌悖挈兒舞張祐各有詩云云

耍娘歌

宜春花夜雪千枝妃子偷行上密隨便喚耍娘歌一曲
六宮生老是蛾眉

悖挈兒舞

東風南內百花時道唱梁州急遍吹揭手便拈金碗舞
上皇驚笑悖挈兒

容兒鉢頭

爭走金車叱鞅牛笑聲誰是說千秋兩邊角子羊門裏
猶學容兒弄鉢頭

李謩笛

平時東幸洛陽城天樂宮中夜徹鳴無奈李謩偷曲譜
酒樓吹笛是新聲

折楊柳枝

莫折宮前楊柳枝明皇曾向笛中吹傷心日暮烟霞起
無限春愁生翠眉

凝碧池邊斂翠眉景陽樓下綰青絲那勝妃子朝元閣
玉手和烟弄一枝

玉環琵琶

宮樓一曲琵琶聲滿眼雲山是去程回顧段師非汝意

玉環休把恨分明玉環者睿宗所御琵琶也明皇置別榻帕覆之未嘗持用祿山犯京上欲遷幸登華萼樓置酒進玉環命樂工

賀懷智取調之又命禪定僧段師彈之段師用皮絃

集靈臺

集靈臺明皇所作雜錄云在華清宮中非漢集靈宮中之臺也

日光斜照集靈臺紅樹花迎曉露開昨夜上皇新授錄

太真含笑入簾來

虢國夫人承主恩平明騎馬入金門却嫌脂粉污顏色

淡掃蛾眉朝至尊

華清宮

天闕沉沉夜未央碧雲仙曲舞霓裳一聲玉笛向空盡

月滿驪山宮漏長

紅樹蕭蕭閣半開上皇曾幸此宮來至今風俗驪山下

村笛猶吹阿濫堆

紀事云驪宮小禽名阿濫堆明皇御玉笛採其鼓翻為曲且名焉遠近以笛爭效之

山遶宮牆處處聲殘紅長綠露華清武皇一日夢不覺

十二玉樓空月明

雨淋鈴

雨淋鈴夜却歸秦猶見張徽一曲新長說上皇垂淚教

月明南內更無人

明皇別錄帝幸蜀南入斜谷屬淋雨彌旬于道中聞鈴聲與雨相應因採其聲為雨淋鈴曲以寄恨時梨園樂

工張徽善箏篋從至蜀都以曲授之洎至德中幸華清宮左右皆非昔人帝于望京樓令張徽奏此曲不覺悽愴流涕

退宮人

開元皇帝掌中憐流落人間二十年長說承天門上宴

張祐
王涯

百官樓下拾金錢

歌喉漸退出宮闈泣話伶官上許歸猶說入時歡聖壽
內人初著五方衣

題金陵渡

金陵津渡小山樓一宿行人自可愁潮落夜江斜月裏
兩三星火是瓜州

晚秋潼關西門作

日落寒郊烟物清古槐陰黑少人行關門西去華山色
秦地東來河水聲

題弋陽館

一葉飄然下弋陽殘霞昏日樹蒼蒼吳溪漫淬干將劍

却是猿聲斷客腸

獻王智興

十年受命鎮方隅孝節忠規兩有餘誰信將壇嘉政外

李陵章句右軍書

紀事云智興鎮徐州見從事會飲賦詩引毫立成祐獻
詩頌美左右曰書生諂辭耳智興叱曰張生海內名士

贈竇家小兒

潏綠衣裳小小人每來廳裏解相親天生合去雲霄上
一尺松栽已出塵

秋曉送鄭侍御

離鴻聲怨碧雲淨楚瑟調高清曉天盡日相看俱不語
西風搖落數枝蓮

聽崔侍御荅葉家歌

宛羅重縠起歌筵
活鳳生花動碧烟
一聲唱斷無人和
觸破秋雲直上天

聽箏

十指尖尖玉笋紅
雁行輕過翠絃中
分明似說長城苦
水咽雲寒一夜風

耿家歌

十二年前邊塞行
坐中無語嘆歌情
不堪昨夜先垂淚
西出陽關第一聲

塞上聞笛

一夜梅花笛裏飛
冷沙晴檻月光輝
北風吹盡向何處

高入塞雲燕雁稀

平原路上題郵亭殘花

雲暗山橫日欲斜
郵亭下馬對殘花
自從身逐征西府
每到花時不在家

徐凝

凝睦州人元和中官至侍郎

雲谿友議稱白樂天為杭州刺史凝與張祜並詣
之求解凝先有題開元寺牡丹詩白到寺看花見
其詩賞之命與同醉而歸試訖解送遂以凝為元
祜次之祜不服自述題金山詩凝曰美則美矣爭
如老夫千古長如白練飛一條界破青山色凝遂

擅場杜牧常不平之盛言祐美異於白後蘇東坡
目為惡詩洪容齋以為諸絕如辭韓侍郎相思林
憶揚州亦皆有情致云

計敏夫云樂天薦凝屈祐論者至今鬱鬱或歸白
之妒才祐元和中作宮體艷詩輕薄之流能其才
合譟得譽其不羈之狀往往間見凝之操履不見
於史然方干學詩於凝贈之詩曰吟得新詩草裏
論戲反其辭謂村裏老也方干世所謂簡古者且
譏凝則凝之朴畧惟魯從可知矣樂天方以實行
求才故薦凝抑祐牧之少年所為亦近於祐為祐
恨白理有之耳

近體詩

題杭州開元寺牡丹

此花南地知誰種慚愧僧閒用意栽海燕解憐頻睨
胡蜂未識更徘徊虛生芍藥徒勞妒羞殺玫瑰不敢開
惟有數苞紅萼在含芳只待舍人來

京師得之植于庭時春景方深惠澄設油幕覆其上以俟白至會凝自富春來未識白先題詩云云

樂天刺杭州日令訪求牡丹獨開元寺僧惠澄近于

廬山獨夜

寒空五老雪斜月九江雲鐘磬知何處蒼蒼樹裏聞

宮中曲

披香侍宴插仙花厭著龍綃著越紗恃賴傾城人不及
檀妝惟約數條霞

徐凝
王涯

身輕入寵盡恩私腰細偏能舞柘枝一日新妝拋舊樣
六宮爭畫黑煙眉

樂府新詩

一聲盧女十三絃早嫁城西好少年不羨越溪歌者苦
采蓮歸去綠窗眠

長慶春

山頭水色薄籠煙久客新愁長慶年身上五勞仍病酒
天桃窓下背花眠

八月九月望日雨

八月繁雲連九月兩回三五晦漫漫一年悵望秋將盡
不得嫦娥正面看

奉陪相公看花宴會

丞相邀懽事事同玉簫金管咽東風百分春酒莫辭醉
明日的無今日紅
木蘭花謝可憐條遠道音書轉寂寥春去一年春又盡
幾回空上望江橋

憶揚州

蕭娘臉下難勝淚桃葉眉頭易得愁天下三分明月夜
二分無賴是揚州

嘉興寒食

嘉興郭裏逢寒食落日家家拜掃回惟有縣前蘇小小
無人送與紙錢來

題縉雲山鼎池

相傳黃帝鑄鼎處

黃帝旌旗去不回空餘片石碧崔嵬有時風捲鼎湖浪散作晴天雨點來

廬山瀑布

虛空落泉千仞直雷奔入海不暫息千古長如白練飛

一條界破青山色

芥隱筆記云疑一條界破青山色句白公稱之東坡以為塵陋至稱為惡詩天台賦瀑布飛流而界道目為

惡詩無所自耶

相思林

遠客遠遊新過嶺每逢芳樹問芳名長林徧是相思樹爭遣愁人獨自行

自鄂渚至河南將歸江外留辭韓侍郎

一生所遇惟元白天下無人重布衣欲別朱門淚先盡白頭遊子白身歸

古樹

古樹欹斜臨古道枝不生花腹生草行人不見樹少時樹見行人幾番老

翫花

麴塵溪上素紅枝影在溪流半落時時人自惜花腸斷春風却是等閒吹

朱霞燄燄山旄動綠野聲聲杜宇來誰謂蜀王身作鳥自啼還自有花開

誰家躑躅青林裏半見殷花燄燄枝憶得倡樓人送客

全唐詩集卷第三

徐凝 楊凝

王涯

淡紅衫子影門時

花到薔薇明艷絕燕支顆破麥風秋一番弄色一番退
小婦輕妝大婦愁

楊凝

凝字懋功與兄憑弟凌竝負詩名大曆中擢進士
第歷司封員外郎為權幸所忌徙官宣武董晉表
為判官攝行亳州刺史事在幕荒酒遇卒亂還京
拜兵部郎中

近體詩

送客往夏州

憐君此去過居延古塞黃雲共渺然沙濶獨尋邊馬跡

路迷遙指戍人烟夜投孤店愁吟笛朝望行塵喜控弦
聞有故人今從騎何須著論更言錢

柳絮

河畔多楊柳追遊盡狹斜春風一回送亂入莫愁家

花枕

席上沈香枕樓中蕩子妻那堪一夜裏長溼兩行啼

楊衡

衡字仲師吳興人初與符載崔群宋濟隱廬山號
山中四友後登第官至大理評事

古體詩

白紵辭

玉纓翠珮雜輕羅香汗微漬朱顏酡為君起唱白紵歌
清聲裊雲思繁多凝笳哀瑟時相和金壺半傾芳夜促
梁塵霏霏暗紅燭令君安坐聽終曲墜葉飄花難再復

費冠卿

冠卿字子軍池州人登元和二年進士第會母卒
嘆曰干祿養親耳得祿而親喪何以祿為遂歸隱
九華山長慶中殿院李行修舉其孝行以右拾遺
召不赴

近體詩

答蕭建問九華山

自地上青峰懸崖一萬重踐危頻側足登蹙半齊胸飛

狖啼攀桂遊人喘倚松入林寒痺痺近瀑雨濛濛徑滑
石稜上寺開山掌中幡花撲淨地臺殿印晴空勝景層
層別高僧院院逢潛魚候洗鉢老獼戲撞鐘外戶憑雲
掩中廚課水舂搜泥時和麵拾橡半添種渡壑緣槎濟
持燈入洞窮夾天開壁峭透石蹙波雄澗藹清無土潭
潏碧有龍畬田一片淨谷樹萬株濃野客登臨慣山房
幽寂同寒爐樹根火夏牖竹梢風邊鄙籌賢相黔黎託
聖躬君能棄名利歲晏一相逢

閒居卽事

生計唯將三尺僮學他賢者隱墻東照眠夜後多因月
掃地春來祇藉風幾處紅旗驅戰士一園青草伴衰翁

子房仙去孔明死更有何人解指蹤

沈亞之

亞之字下賢吳興人元和十年舉進士辟涇原李
彙幕長慶中累遷殿中丞御史內供奉太和初李
同捷反副行營使栢耆為判官耆擒同捷赴京諸
將害功論列耆坐貶亞之亦貶尉南康後終郢州
掾亞之以文詞得名嘗遊韓愈之門當時李賀杜
牧皆稱許之

古體詩

村居

有樹巢宿鳥無酒共客醉月上蟬韻殘梧桐陰繞地獨

出村舍門吟劇微風起蕭蕭蘆荻叢叫嘯如山鬼應緣
我憔悴為我哭秋思

近體詩

春色滿皇州

何處春輝好偏宜在雍州花明夾城道柳暗曲江頭風
軟遊絲重光融瑞氣浮鬪雞憐短草乳燕傷高樓繡轂
盈香陌新泉溢御溝迴看日欲暮還騎似川流

題候仙亭

新剏仙亭覆石壇雕梁峻宇入雲端嶺北嘯猿高枕聽
湖南山色卷簾看

蔣防

防義興人官右拾遺李紳元稹保薦以司封郎中
知制誥進翰林學士李逢吉逐紳因出之為汀州
刺史

常州志防年十八父友令作秋河賦援筆立就于
簡遂妻以女

近體詩

春風扇微和

麗日催遲景和風扇早春暖浮丹鳳闕韶媚黑龍津澹
蕩迎仙仗霏微送畫輪綠搖官柳散紅待禁花新舞席
皆迴雪歌筵暗送塵幸當陽律候惟願及佳辰

熊孺登

孺登鍾陵人登進士第元和中終藩鎮從事劉白
俱有詩往還執易其從姪也

近體詩

湘江夜泛

江流如箭月如弓行盡三湘數夜中無奈子規知向蜀
一聲聲似怨春風

贈靈徹上人

詩句能生世界春僧家更有姓湯人况聞暗憶前朝事
知是修行第幾身

與左興宗湓城別

江逢九派人將別猿到三聲月為愁不知相見更何日

此夜少年堪白頭

于武陵

武陵會昌時詩人也登大中進士

近體詩

贈賣松人

入市雖求利憐君意獨真欲將寒澗樹賣與翠樓人瘦
葉幾經雪淡花應少春長安重桃李徒染六街塵

山中桂

日暖上山路鳥啼知己春忽逢幽隱樹如見獨醒人石
冷開常晚風多落已頻樵夫應不識歲久伐為薪

西還

不繫與舟閑悠悠吳楚間羞將新白髮却對舊青山一
葉初飛樹幾人同入關長安家尚在秋至又西還

夜與故人別

白日去難駐故人非舊容今宵一別後何處復相逢過
楚水千里到秦山幾重語來天又曉月落滿城鐘

孤雲

南北各萬里有雲心更閒因風離海上伴月到人間洛
浦少高樹長安無舊山徘徊不可駐漠漠更東還

勸酒

勸君金屈卮滿酌不須辭花發多風雨人生足別離

御定全唐詩錄卷第七十

Blank space for the text of the 70th volume of the collected poems.

御定全唐詩錄卷第七十一

禮部侍郎臣徐倬翰林院侍讀學士臣徐元正奉

旨校刊

李德裕

德裕字文饒趙郡人元和宰相吉甫子也以蔭補校書郎河東張弘靖辟為掌書記府罷召拜監察御史穆宗即位擢翰林學士再進中書舍人未幾授御史中丞始吉甫相憲宗牛僧孺李宗閔對直言策痛詆當路吉甫訴於帝且泣有司皆得罪遂與為怨吉甫又為帝謀討兩河叛將李逢吉沮解其言功未既而吉甫卒裴度實繼之逢吉以議不

御定全唐詩錄卷第七十一

李德裕

三

合罷去故追銜吉甫而怨度擯德裕不得進至是
間帝暗慵誅度使與元稹相怨奪其宰相而已代
之欲引僧孺益樹黨乃出德裕為浙西觀察使俄
而僧孺入相由是牛李之憾結矣太和三年召拜
兵部侍郎裴度薦才堪宰相而李宗閔以中人助
先秉政且得君出德裕為鄭滑節度使引僧孺協
力罷政事二怨相濟凡德裕所善悉逐之踰年徙
劍南西川以兵部尚書召俄拜中書門下平章事
封贊皇縣伯宗閔罷代為中書侍郎集賢殿大學
士鄭注李訓怨之即復召宗閔輔政拜德裕為興
元節度使入見帝自陳願留闕下復拜兵部尚書

宗閔已行不可止更徙鎮海軍以代王璠璠與李
漢譖之貶為太子賓客分司東都復貶袁州刺史
未幾宗閔以罪斥而注訓等亂敗乃徙滁州刺史
又以太子賓客分司東都開成初起為浙西觀察
使德裕三在浙西出入十年遷淮南節度使武宗
立召為門下侍郎同中書門下平章事尋冊拜司
空策功拜太尉進封趙國公改衛國公當國凡六
年威名獨重於時宣宗卽位德裕奉冊太極殿帝
退謂左右曰向行事近我者非太尉耶每顧我毛
髮為森豎翼日罷為檢校司徒同中書門下平章
事荆南節度使俄徙東都留守白敏中令狐絢使

黨人斥德裕陰事故以太子少保分司東都再貶潮州司馬明年貶崖州司戶叅軍事德裕少力學善為文雖在大位手不去書本傳云德裕自鎮浙西迄淮甸有詩人劉三復者常叅佐賓筵軍政之餘與吟詠終日其論文曰沈休文以音韻為切重輕為難語雖甚工旨則未遠未可以言文外意也古之辭高者蓋以言妙而工適情不取於音韻意盡而止成篇不拘於隻耦故篇無足尤詞寡累句古辭如金石琴瑟尚於至音今則如絲竹鞀鼓迫於促節即知聲律之為其弊也又曰世有非文章者曰詞不出於風雅思不越於離騷模寫古人何

足貴也余曰譬如日月雖終古常見而光景常新此所以為靈物者也嘗為文箴曰文之為物自然靈氣恍惚而來不思而至杼軸得之淡而無味琢刻藻績彌不足貴如彼璞玉錯以金翠美質既彫良寶斯棄其大旨如此

紀事云德裕營平泉莊遠方以異物奉之或題曰隴右諸侯供語烏日南太守送名花及譴責或作詩云畫閣不開梁燕去朱門罷掃乳烏歸千巖萬壑應惆悵流水斜傾出武關

北夢瑣言云李德裕幼而神俊憲宗賞之坐於膝上父吉甫每以敏辨誇於同列武元衡召之問曰

吾子所嗜何書意欲探其志也德裕不應翼日元
衡以告吉甫因戲曰公誠大癡耳吉甫歸責之德
裕曰武公身為帝弼不問理國調陰陽而問所嗜
書者禮部成均之職也其言不當所以不應吉甫
復告元衡大慚由是振名

撫言云德裕頗為寒素開路及謫官南去或有詩
曰八百孤寒齊下淚一時回首望崖州

劇談錄德裕東都平泉莊去洛城三十里卉木臺
榭若造仙府有虛檻對引泉水縈回疏鑿像巫峽
洞庭十二峰九派迄於海門江山景物之狀以間
行徑有平石以手摩之皆隱隱雲霞龍鳳草樹之

形自為記記所有奇花異木之品又為記戒子孫
嚮平泉及以平泉一樹一石與人非吾子孫也

古體詩

自敘

非尚子遍
游五嶽

五嶽逕雖深遍游心已蕩苟能知止足所遇皆清曠七
十難可期一丘乃微尚遙懷少室山常恐非吾望

夏晚有懷平泉林居

宜春作

孟夏首畏途捨舟在徂暑愀然何所念念我龍門塢密
竹無蹊徑高松有四五飛泉鳴樹間颯颯如度雨菌桂
秀層嶺芳蓀媚幽渚稚子候我歸衡門獨延佇誰言聖
與哲曾是不懷土公旦既思周宣尼亦念魯矧余竄炎

裔日夕誰晤語眷闕悲子牟班荆感椒舉悽悽視環玦
惻惻步庭廡豈待莊舄吟方知倦羈旅

清明後憶山中

遙思寒食後野老林下醉月照一山明風吹百花氣飛
泉與萬籟鬚疑簫吹不待曙華分已應喧鳥至

懷山居邀松陽子同作

我有愛山心如饑復如渴出谷一年餘常疑十年別春
思巘花爛夏憶寒泉冽秋憶泛蘭卮冬思翫松雪晨思
小山桂暝憶深潭月醉憶剖紅梨飯思食紫鱖坐思藤
蘿密步憶莓苔滑晝夜百刻中愁腸幾回絕每念羊叔
子言之豈常輟人生如意事十乃居七八我未及懸輿

今猶佩朝紱焉能逐麋鹿便得遊林樾范恣滄波舟張
惟赤松列惟應詎身恤豈敢忘巨節器滿自當歆物盈
終有缺從茲返樵逕庶可希前哲

思在山居日偶成此詠邀松陽子同作

閑思昔歲事忽忽念伊川乘月步秋坂滿山聞石泉回
塘碧潭映高樹綠蘿懸露下叫田鶴風來嘶晚蟬懷茲
長在夢歸去且無緣幽谷人未至蘭茗應更鮮

思鄉園老人

常羨葦門翁所思惟歲稔遙知松月曙尚在山牕寢蘭
氣入幽簾禽言傍孤枕晨興步巖逕更酌寒泉飲

憶平泉山居贈沈吏部

昔聞羊叔子茆屋在東渠豈不念歸路徘徊畏簡書乃
知軒冕客自與田園疎沒世有遺恨精誠何所如嗟予
寡時用夙志在林間雖抱山水癖敢希仁智居清泉繞
舍下修竹蔭庭除幽徑松蓋密小池蓮葉初從來有好
鳥近復躍儵魚少室暎川陸鳴臯對蓬廬張何舊寮案
余與吏部乃金門寮故也相勉在懸輿常恐似伯玉瞻前慙魏舒

比聞龍門敬善寺有紅桂樹獨秀伊川嘗於江南
諸山訪之莫致陳侍御知予所好因訪剡溪樵
客偶得數株移植郊園衆芳色沮乃知敬善所
有是蜀道茵草徒得嘉名因賦是詩兼贈陳侍

御金陵作

昔聞紅桂枝獨秀龍門側越叟遺數株周人未嘗識平
生愛此樹攀翫無由得君子知我心因之為羽翼豈煩
嘉客譽且就清陰息來自天姥岑長疑翠嵐色芬芳世
所絕偃蹇枝漸直瓊葉潤不凋珠英粲如織猶疑翡翠
宿想待鷓鴣食寧止暫淹留終當更封植

早秋龍興寺江亭閒眺憶龍門山居寄崔張舊從

事宜春作

江亭感秋至蘭徑悲露泣秔稻秀晚川杉松蔚晴巘嗟
予有林壑茲夕念原衍綠篠連嶺多青莎近溪淺淵明
菊猶在仲蔚蒿莫剪喬木粲凌苔陰崖積幽蘚遙思伊
川水北渡龍門峴蒼翠雙闕間逶迤清灘轉故人在鄉

國歲晏路悠緬惆悵此生涯無由共登踐

鴛鴦篇

君不見昔時同心人化作鴛鴦鳥和鳴一夕不暫離交
頸千年尚為少二月草霏霏山櫻花未稀金塘風日好
何處不相依既逢解佩游女更值凌波宓妃精光搖翠
蓋麗色映珠璣雙影相伴雙心莫違淹留碧沙上蕩漾
洗紅衣春光兮宛轉嬉遊兮未返宿莫近天泉池飛莫
近長洲苑爾願歡愛不相忘須去人間羅網遠南有瀟
湘洲且為千里遊洞庭無苦寒沅江多碧流管為薄命
妾無日不含愁今為水中鳥頡頏自相求洛陽女兒在
青閣二月羅衣輕更薄金泥文彩未足珍画作鴛鴦始

堪着亦有少婦破瓜年春閨無伴獨嬋娟夜夜學織連
枝錦織作鴛鴦人共憐悠悠湘水濱清淺漾初蘋菖花
發豔無人識江柳逶迤空自春唯憐獨鶴依琴曲更念
孤鸞隱鏡塵願作鴛鴦被長覆有情人

近體詩

秋日登郡樓望贊皇山感而成詠

昔人懷井邑為有掛冠期顧我飄蓬者長隨泛梗移越
吟因病感潘鬢入愁悲北指邯鄲道應無歸去期

漢州月夕游房公西湖

丞相鳴琴地何年閉玉徽房公以好琴聞海內偶因微月夕重啟故
樓扉桃李蹊空在芙蓉客暫依南史安陸侯與王仲寶長史庾杲之書稱泛深水依芙蓉何其麗也

誰憐濟川楫長與夜舟歸

秋日美晴郡樓間眺寄荆南張書記

高檻涼風起清川旭景開秋聲向楚去爽氣自山來霄外鴻初返簷間鷺已歸不因烟雨夕何處夢陽臺

寄茅山孫鍊師

何地最翛然華陽第八天松風清有露蘿月淨無烟乍
警瑤壇鶴時嘶玉樹蟬欲馳千里思惟戀鳳門泉

陵地肺土良水清作井正似長安鳳門外井水味當是洞泉遠通耳

遙傷郊山孫尊師

蟬脫遺虛白蛻飛入上清同人悲劍解舊友覺衣輕黃
鵠徑將舉斑麟儼未行惟應鮑靚室中夜識琴聲

金格期初至飈輪去不停山摧武擔石天墮少微星弟
子悲徐甲門人泣蔡經空聞留玉鳥猶在阜鄉亭

空宇留丹竈層霞被羽衣舊山聞鹿化遺鳥尚鳧飛數
日奇香在何年白鶴歸想君游下泊方歎里閭非

洛中士君子多以平泉見呼愧獲方外之名因以

此詩為報奉寄劉賓客

非高柳下逸自愛竹林閑才異居東里愚因在北山徑
荒寒未掃門設畫長關不及鴟夷子悠悠烟水間

余所居平泉村舍近蒙韋常侍大尹特改嘉名因

寄詩以謝

未謝留侯疾常懷仲蔚園閑謠紫芝曲歸夢赤松村忽
改蓬蒿色俄吹黍谷暄多慙孔北海傳教及衡門

山信至說平泉別墅草木滋長地轉幽溪悵然思

歸復此作

忽聞樵客語暫慰野人心幽徑芳蘭密閑庭秀木深麇
麇來澗底鳧鵠遍川潏誰念滄溟上歸歟起歎音

初夏有懷山居

山中有所憶夏景始清幽野竹陰無日巖泉冷似秋翠
岑當累榭皓月入輕舟只有思歸夕空簾且夢游

置平泉別墅後官藩服出將入相三十年
未嘗游居而題寄歌詩皆銘之於石

憶晚眺

伊川新雨霽原上見春山緱嶺晴虹斷龍門宿鳥還牛
羊平野外桑柘夕烟間不及鄉園叟悠悠盡日閑

憶春耕

郊外杏花拆林間布穀鳴原田春雨後谿水夕流平野
老荷蓑至和風吹草輕無因共沮溺相與事巖畊

憶春雨

春鳩鳴野樹細雨入池塘潭上花微落谿邊草更長梳
風白鷺起拂水綵鴛翔最羨歸飛鷺年年在故鄉

憶初暖

今日初春暖山中事若何雪開喧鳥至澌散躍魚多幽
翠生松柏輕烟起薜蘿柴扉常晝掩惟有野人過

憶村中老人春酒有劉楊二叟善釀

二叟茅茨下清晨飲濁醪雨殘紅芍藥風落紫櫻桃巢
鷺啣泥疾簷蟲掛網高閑思春谷事轉覺宦途勞

憶茗芽

谷中春日暖漸憶掇茶英欲及清明火能銷醉客醒松
花飄鼎泛蘭氣入甌輕飲罷閑無事捫蘿谿上行

寒食日三殿侍宴奉進詩一首

宛轉龍蛇節參差燕羽高風光搖禁柳霽色暖宮桃春
露明仙掌晨霞照錦袍雪凝陳組練林植聳干旄廣樂
初踰鳳神仙欲抃鼉鳴笳朱鷺起疊鼓紫駢豪象舞嚴
金鎧豐歌耀寶刀不勞孫子法自得太公韜已上四句奉述
內樂破陣樂

分席羅元冕行觴舉縹醪中時落羽撞末乍升猱瑞
景開陰翳薰風散鬱陶天顏歡益醉臣節闕 楛矢

方來貢雕弓已載橐英威揚絕漠神算盡臨洮赤縣陽
和布蒼生雨露膏野平惟有麥田闢又無蒿祿秩榮三
事功勳乏一毫寢謀慙汲黯秉羽貴孫敖煥若遊元圃
歡如享太牢輕生何以報祇自比鴻毛

述夢詩四十韻有序

去年七月溽暑之後驪降其夕五鼓未盡涼風
淒然始覺枕簟微冷俄而假寐斯熟忽夢賦詩
懷禁掖舊遊凡四十餘韻初覺尚憶其半經時
悉已遺忘今屬歲杪無事羈懷多感因綴其所

遺為述夢詩以寄一二僚友

賦命誠非薄良時幸已遭君當堯舜日官接鳳凰曹目

睇烟霄潤心驚羽翼高此六句夢中作倚梧連鶴禁脾晚接龍韜

內署北連春宮西接羽林軍我后憐詞客先朝曾宣諭卿等是我門客吾寮並雋髦著書同

陸賈待詔比王褒重價連元璧英辭淬寶刀泉流初落

澗文賦稱言泉流於齒吻露滴更濡毫赤豹忻來獻彤弓喜暫縻時

戎乞盟幽鎮二帥束身赴闕海內無事者累月詩稱赤豹黃龍蓋蠻貊之貢物非烟含瑞氣馴雉潔霜毛靜

室便幽獨虛樓散鬱陶學士各有一室西垣有小樓時燕語於此花光晨艷艷松韻

晚騷騷画壁看飛鶴山圖見巨鼇內署垣牆皆有画松鶴先是西壁画海中曲龍山憲宗欲臨幸

中使懼而塗焉倚簷陰藥樹落落蔓葡萄此八句悉是內署物色荷靜蓬

池膾冰寒郢水醪每學士初上賜食皆蓬萊池魚膾夏至後頒賜冰及燒酒以酒味稍濃常和冰而飲禁中有郢酒坊也

荔枝來自遠盧橘賜常叨先朝初臨御南方會獻荔枝亦蒙頒賜麝氣隨蘭澤

霜華入杏膏恩光唯覺重攜挈未為勞此八句以述恩賜每有賜與常攜挈而歸

夕閱梨園騎宵聞禁仗燠每梨園獵回或抵暮夜院門常見歸騎扇迴交綵翟

雕起颺金條轡待袁絲攬書期蜀客操盡規常寒寒退

舍尚忉忉此八句述內庭所觀龜顧垂金鈕鸞飛曳錦袍會蒙賜錦袍曳者蓋取詩人不

曳不婁之義也御溝楊柳弱天廡驕驕豪學士皆蒙借飛龍馬屢換青春直閑

隨上苑遨普濟寺與芙蓉院相連常所游眺芙蓉亦謂之南苑也烟低行殿竹風折繞垣

桃此八句述沐澣日游戲聚散俄成昔悲愁益自熬每懷仙駕遠更

望茂陵號地接三茅嶺川迎伍子濤代稱海濤是伍子胥憤氣所作花迷瓜

步暗石固蒜山牢此兩句是夢中所作蘭野凝青管梅洲動翠篙泉

魚驚綵仗溪鳥避干旄感舊心猶絕思歸首更搔無聊

燃蜜炬誰復勸金舳余自到此絕無夜宴酒器中大者呼為舳嵐氣
朝生棟城陰暝入濠望煙歸海嶠送鴈渡江臯宛馬嘶
寒擁吳鈎在錦弢未能追狡兔空覺長江蒿水國逾千
里風帆過萬艘閱川終古恨唯見暮滔滔

故人寄茶

一作曹鄴

劍外九華英緘題下玉京開時微月上碾處亂泉聲半
夜邀僧至孤唵對竹烹碧流霞脚碎香泛乳花輕六腑
睡神去數朝詩思清其餘不敢費留伴讀書行

謫仙嶺道中作

嶺水爭分路轉迷枕榔柳葉暗蠻溪愁衝毒霧逢蛇草
畏落沙蟲避燕泥五月畚田收火米三更津吏報潮雞

不堪腸斷思鄉處紅槿花中越鳥啼

無題

松倚蒼崖老蘭臨碧澗衰不勞鄰舍笛吹起舊時悲

長安秋夜

內官傳詔問戎機載筆金鑿夜始歸萬戶千門皆寂寂
月中清露點朝衣

懷京國

海上東風犯雪來臘前先折鏡湖梅遙思禁苑青春夜
坐待宮人畫詔回

登崖州城作

獨上高樓望帝京鳥飛猶是半年程青山侶欲留人住

百匝千遭遶郡城

南部新書崖州郡有北亭子謂之望闕亭李太尉每登臨未嘗不北睇悲咽有云今傳大尉崖州詩皆仇

家所作只此一首親作

牛僧孺

僧孺字思黯隴西人貞元中第進士歷相穆敬兩朝封奇章郡公後出鎮鄂渚文宗朝徵入再相夙與李贊皇相惡會昌中分司東都貶循州長史大中初還為太子少師

近體詩

和樂天除夜

惜歲歲今盡少年應不知淒涼數流輩歡喜見孫兒暗減一身力潛添滿鬢絲莫愁花笑老花自幾多時

李蘇州遺太湖石奇狀絕倫因題二十韻奉呈夢

得樂天

胚渾何時結嵌空此日成掀蹲龍虎鬪挾恠鬼神驚帶雨新水淨輕敲碎玉鳴攬又鋒又簇縷絡鈞絲縈近水搖奇冷依松助澹清通身鱗甲隱透穴洞天明醜凸隆胡準深凹刻兕觥雷風疑欲變陰黑訝將行噤瘥微寒早輪囷數片橫地祇愁墊壓鰲足困支撐珍重姑蘇守相憐嬾慢情為探湖裏物不怕浪中鯨利涉餘千里山河僅百程池塘初展見金玉自凡輕側眩魂猶悚周觀意漸平似逢三益友如對十年兄旺興添魔力消煩破宿醒媿人當綺皓視秩即公卿念此園林寶還須別識

精詩仙有劉白為汝數逢迎

本傳云曾孺留守洛都築第於歸仁里嘉禾怪石置之塔庭館宇清華竹

木幽邃常與詩人白居易吟咏其間

席上贈劉夢得

粉署為郎四十春今來名輩更無人
休論世上昇沉事且聞樽前見在身
珠玉會應成咳唾山川猶覺露精神
莫嫌恃酒輕言語曾把文章謁後塵

雲溪友議云曾孺赴舉之秋嘗投贄於劉補闕禹錫對客展卷飛筆塗鼠其文歷二十餘歲劉轉汝州公鎮淮南枉道駐旌信宿酒酣賦詩劉方悟性年改公文卷曾孺贈詩云

王涯

涯字廣津太原人貞元中擢進士舉宏詞為翰林
學士起居舍人元和間從謫籍召知制誥拜相尋
罷守兵部出鎮文宗嗣位召為太常復拜相甘露

之變為宦官仇士良所族涯博學好古能為文藏
書數萬卷及名畫法書籤軸之盛侔於天府
初涯與張仲素令狐楚為舍人同編其五七言絕
句為三舍人集其本尚存故絕句較他體獨多

近體詩

春江曲

搖漾越江春相將看白蘋歸時不覺夜出浦月隨人
家寄清江岼征人幾歲遊不知潮水信每月到沙頭

閨思

洞房今夜月如練復如霜為照離人恨亭亭到曉光

閨人寄遠

花明綺陌春柳拂御溝新為報遼陽客流芳不待人
遠成功名薄幽閨年貌傷粧成對春樹不語淚千行
鶯啼綠樹淡燕語雕梁晚不省出門行沙場知近遠
形影一朝別煙波千里分君看望君處祇是起行雲

宮詞

內人宜着紫衣裳冠子梳頭雙眼長新睡起來思舊夢
見人忘却道勝常
春來新插翠雲釵尚着雲頭踏殿鞋欲得君王回一顧
爭扶玉輦下金階
五更初起覺風寒香炷燒來夜已殘欲捲珠簾驚雪滿
自將紅燭上樓看

各將金鎖鎖宮門院院青娥待至尊頭白監門掌來去
問誰頻是最承恩
夜久盤中蠟滴稀金刀剪起盡霏霏傳聲總是君王喚
紅燭臺前着舞衣
箏翻禁曲覺聲難玉柱皆非舊處安記得君王曾道好
長因下輦得先彈
一叢高髻綠雲光宮樣衣衫淡淡黃為看九天公主貴
外邊爭學內家妝
宜春院裏駐仙輿夜宴笙歌總不如傳說金箋題寵號
鐙前御筆與新書
永巷重門漸半開宮官着鎖隔門回誰知曾笑他人處

今日將身自入來
春風簾裡舊青娥無奈新人奪寵何寒食禁花開滿樹
玉堂終日閉時多
碧繡簷前柳散垂守門宮女欲攀時曾經玉輦從容處
不敢臨風折一枝
鴉飛深在禁城墻多遶重樓複殿旁時向春簷瓦溝上
散開雙翅占朝光
白雪猧兒拂地行慣眠紅毯不會驚深宮更有何人到
只曉金階吠晚螢
百尺仙梯倚閣邊內人爭下擲金錢風來競看銅烏轉
遙指朱竿在半天

春風擺蕩禁花枝寒食鞦韆滿地時又落深宮石渠裏
盡隨流水入龍池
彫墻不斷接宮城金榜皆書殿院名萬轉千迴相隔處
各調絃管對聞聲
霏霏春雨九重天漸暖龍池御柳煙玉輦游時應不避
千廊萬屋自相連
禁門煙起紫沈沈樓閣當中複道深長到暮天凝不散
掖庭宮裏動秋砧
炎炎夏日滿天時桐葉交加覆玉墀向晚移鐙上銀簾
叢叢綠鬢坐彈碁
瞳瞳日出大明宮天樂遙聞在碧空禁樹無風正和暖

玉樓金殿曉光中
迥出芙蓉閣上頭九天懸處正當秋年年七夕晴光裏
宮女穿針盡上樓
教來鸚鵡語初成久閉金籠慣認名總向春園看花去
獨於深院喚人聲
銀瓶瀉水欲朝妝燭焰紅高粉壁光共怪滿身珠翠冷
黃花瓦上有新霜
迎風殿裏罷雲和起聽新蟬步淺莎爲愛九天和露滴
萬年枝上最聲多
御果收時屬內官傍簷低壓玉闌干明朝摘向金華殿
盡日枝邊次第看

內裏松香滿殿聞四行階下暖氤氳春深欲去黃金粉
繞樹宮娥着絳裙
禁樹傳聲在九霄內中殘火獨遙遙千官待取門猶閉
未到宮前下馬橋

漢苑行

二月春風變柳條九天清樂奏雲韶蓬萊殿後花如錦
紫閣街前雪未消
迴雁高飛太液池新花低發上林枝年光到處皆堪賞
春色人間總不知
春風澹澹影悠悠鶯囀高枝燕入樓千步回廊聞鳳吹
珠簾處處上銀鈎

塞下曲

三戍漁陽再渡遼
駢弓在臂劍橫腰
匈奴似欲知名姓
休徬陰山更射鵞
朔雪飄飄開雁門
平沙歷亂卷蓬根
功名恥計擒生數
直斬樓蘭報國恩
陰磧茫茫塞草腓
桔槔原上暮烟飛
關河北望天連海
蘇武曾將漢節歸

秋夜曲

丁丁漏水夜何長
漫漫輕雲露月光
秋逼暗蟲通夕響
寒衣未寄莫飛霜
桂魄初生秋露微
輕羅已薄未更衣
銀箏夜久殷勤弄

心怯空房不忍歸

閨人春思

愁見游空百丈絲
春風挽斷更傷離
桃花落盡青苔地
盡日無人誰得知

秋思

網軒涼吹動輕衣
夜聽更長玉漏稀
月度天河光轉溼
鵲驚秋樹葉頻飛
宮連太液見滄波
暑氣微消秋意多
一夜輕風蘋末起
露珠翻盡滿池荷

舒元興

元興婺州人
元和中登進士第
文宗朝轉監察御

史歷御史中丞以刑部侍郎同平章事甘露之變
為左軍所族

本傳元輿性詭激與李訓善訓引為相以謀誅宦
官熒主聽致決裂皆二人為之諸相王涯賈餗實
不知也初元輿為牡丹賦時稱其工死後帝一日
凭殿欄觀牡丹誦其警句忽省是元輿詞為泣下

古體詩

坊州按獄

中部接戎塞頑山四周遭風冷木長瘦石礮人亦勞牧
守苟懷仁癢之時為瘙其愛如赤子始得無啼號奈何
貪狼心潤屋沉脂膏攫搏如猛虎吞噬若狂獒山秃逾

高採水窮益深撈龜魚既絕跡鹿兔無遺毛氓苦稅外
緡吏憂笑中刀大君明四目燭之動秋毫眷茲一州命
慮齊墜波濤臨軒詔小臣汝往窮貪饕分明舉公法為
我緩窮騷小臣誠小心奉命如煎熬飲冰不待夕驅馬
凌晨臯及此督簿書游魂出狴牢門墻見狼狙案牘聞
腥臊探情與之言變態如姦獠真非既巧飾偽意乃深
韜去惡猶農夫稂莠須耘薙恢恢布疎網罪者何由逃
自顧孱鈍姿利器非能操六旬始歸奏霜落秋原蒿寄
謝守土臣努力清郡曹須知聽甚卑勿謂天之高

坊州按獄蘇氏莊記室二賢自鄜州走馬相訪留
連數日發後獨坐寂寞因成詩寄之

十年一相見世路信多岐雲雨易分散山川長間之我
銜鳳闕恩按獄橋山陞君在龍驤府掌奏羽檄詞相去
百餘里魂夢自相馳形容在曾臆書札通相思煩君愛
我深輕車忽載脂塞門秋色老霜氣方凝姿此地少平
川岡阜相參差誰知路非遠行者多云疲君能犯勁風
信宿凌歛危情親不自倦下馬開雙眉相對坐沉吟屈
指驚歲時且莫問一杯一盃欣共持陽烏忽西傾明蟾
掛高枝捲簾引瑤玉滅燭臨霜墀中庭有疎蘆淅淅聞
風吹長河卷雲色凝碧無瑕疵一言開我懷曠然澹希
夷悠悠夜方永冷思偏相宜眉睫無他人與君閑解題
陶然叩寂寞更請吟清詩得意且忘言何況竹與絲頃

刻過三夕起坐輕四支明朝告行去憮然還別離出門
送君去君馬揚金羈迴來坐空堂寂寞無人知重重碧
雲合何處尋佳期

近體詩

贈潭州李尚書

湘江舞罷忽成悲便脫蠻靴出絳帷誰是蔡邕琴酒客
魏公懷舊嫁文姬

雲溪友議李翱在長沙有故章中丞愛姬所生女流
落爲妓翱憫之擇士人嫁焉元與自京馳詩贈翱

章孝標

孝標桐廬人家錢塘登元和十四年進士第初除
秘書省正字太和中辟山南東道從事試大理評
事

紀事云桐廬前有八元後有孝標登第復同姓而
官皆不達

近體詩

歸海上舊居

鄉路繞蒹葭縈紆出海涯人衣披蜃氣馬跡印鹽花草
沒題詩石潮摧坐釣槎還歸舊窓裏凝思向餘霞

西山廣福院

野寺孤峰上危樓聳翠微捲簾滄海近洗鉢白雲飛竹
影臨經案松花點衲衣日斜登望處湖畔一僧歸

田家

田家無五行水旱卜蛙聲牛犢乘春放兒孫候暖耕池

塘烟未起桑柘雨初晴歲晚香醪熟村村自送迎

少年行

平明小獵出中軍異國名香滿袖薰画榼倒懸鸚鵡背
花衫對舞鳳凰文手攏白馬嘶春雪臂竦青骹入暮雲
落日胡姬樓上飲風吹簫管滿樓聞

貽美人

諸侯帳下慣新妝皆怯劉家薄媚娘寶髻巧梳金翡翠
羅裙宜著繡鴛鴦輕輕舞汗初沾袖細細歌聲欲遶梁
何事不歸巫峽去故來人世斷人腸

柘枝

柘枝初出鼓聲招花鈿羅衫聳細腰移步錦鞞空綽約

迎風繡帽動飄飄
亞聲踏節鸞形轉
背面羞人鳳影嬌
祇恐相公看未足
便隨風雨上青霄

淮南李相公席上賦春雪

六出花飛處處飄
粘窓着砌上寒條
朱門到曉難盈尺
盡是三軍喜氣消

撫言云李紳鎮揚州請孝標賦春雪詩命題於臺盤上孝標唯然索筆一揮云

歸燕詞辭工部侍郎

舊壘危巢泥已落
今年故向社前歸
連雲大厦無棲處
更傍誰家門戶飛

古今詩話云孝標元和十三年下第時輩多為詩以刺主司獨孝標為歸燕詞留獻侍郎庾承宣庾得詩展轉吟諷恨其遺落來年又重典禮曹孝標登第

贈陸暢浙西進詩除官

帝城雲物得陽春
水國煙花失主人
昨日天風吹樂府

六宮絲管一時新

李廓

廓宰相程之子
登元和進士第
以詩名聞於時
累官潁州刺史
大中末終武寧節度使

古體詩

雞鳴曲

星稀月沒入五更
膠角角雞初鳴
征人牽馬出門立
辭妾欲向安西行
再鳴引頸簷頭下
月中角聲催上馬
纔分地色第二鳴
旌旆紅塵已出城
婦人上城亂招手
夫婿不聞遙哭聲
長恨雞鳴別時苦
不遣雞棲近窓戶

鏡聽詞

匣中取鏡辭竈王羅衣掩盡明月光
管時長着照容色
今夜潛將聽消息
門前地黑人來稀
無人錯道朝夕歸
更深弱體冷如鐵
繡帶菱花懷裏熱
銅片銅片如有靈
願得照見行人千里形

近體詩

長安少年行

金紫少年郎繞堦鞍馬光
身從左中尉官屬右春坊
刻戴揚州帽重薰異國香
垂鞭踏青草來去杏園旁
追逐輕薄伴閑遊
不着緋長攏出獵馬
數換打毬衣
曉日尋花去春風帶酒歸
青樓無晝夜歌舞歇時稀
日高春睡足帖馬賞年華
倒插銀魚袋行隨金犢車還

攜新市酒遠醉曲江花
幾度歸侵黑金吾送到家
好飲耽長夜天明燭滿樓
留人看獨脚踏馬換偏頭樂
奏會無歇杯巡不暫休
時時遙冷笑怪客有春愁
遨遊攜艷妓裝束是男兒
杯酒逢花住笙歌簇馬吹鸞
聲催曲急春色送歸遲
不以聞街鼓華筵待月移
賞春唯逐勝大宅可曾歸
不樂還逃席多狂慣
叔衣歌人踏日起語燕捲簾
飛好婦唯相妬倡樓不醉稀
戟門連日閉苦飲惜殘春
開鎖通新客教姬屈醉人請
歌牽白馬自舞蹈紅茵時
輦皆相許平生不負身
新年高殿上始見有光輝
玉雁排方帶金鵝立仗衣
酒深和椀賜馬疾打珂飛
朝下人爭看香街意氣歸

遊士慵騎馬隨姬入坐車樓邊聽歌吹簾外插釵花樂
眼從人鬧歸心畏日斜蒼頭來去報飲伴到倡家
小婦教鸚鵡頭邊喚醉醒犬嬌眠玉簟鷹掣撼金鈴碧
地攢花障紅泥待客亭雖然長按曲不飲不曾聽

落第

榜前潛制淚衆裏自嫌身氣味如中酒情懷似別人暖
風張樂席晴日看花塵盡是添愁處深居乞過春

夏日途中

樹夾炎風路行人正午稀初蟬數聲過戲蝶一團飛日
色欺青鏡槐膏點白衣無成歸故里自覺少光輝

上令狐舍人

名利生愁地貧居歲月移買書添架上斷酒過花時宿
客嫌吟苦乖童恨睡遲近來唯儉靜將此答深知

送振武將軍

葉葉歸邊騎風頭萬里乾金裝腰帶重錦縫耳衣寒蘆
酒燒蓬煖霜鴻撚箭看黃河古城道秋雪白漫漫

贈商山東於嶺僧

商嶺東西路欲分兩間茅屋一溪雲師言耳重知師意
人是人非不欲聞

周賀

賀字南卿初從浮圖名清塞詩格清雅與賈島無
可齊名寶曆中姚合為杭州守投謁合誦其哭僧詩

大愛之加以冠巾

按統籤內周賀詩尚有數首可選因重見清塞集內故不錄

徐獻忠曰賀詩沉鬱有格力寫象痛切意旨融變五言皆有深致警句為多

近體詩

旅情

黃葉下堦頻徐徐起病身殘秋螢出盡獨夜雁來新別業去千里舊鄉空四鄰孤舟尋幾度又識岳陽人

冬日山居思鄉

大野始嚴凝雲天曉色澄樹寒稀宿鳥山迥少來僧背日收窓雪開爐釋硯冰忽然歸故國孤想寓西陵

入靜隱寺途中作

亂雲迷遠寺入路認青松鳥道緣巢影僧鞋印雪蹤草烟連夜燒溪霧隔霜鐘更遇樵人問猶言過幾峰

春喜友人至山舍

鳥鳴春日晚喜見竹門開路自高巘入人騎瘦馬來折花林影動移石澗聲回更欲留深語重城暮色催

宿李樞書齋

書齋經暮雨四面絕纖埃眠客聞風覺飛蟲入燭來夜涼書讀遍月正戶全開住遠稀相見留連宿始回

題何氏池亭

信是虛閒地亭高亦有苔繞池逢石坐穿竹到山回果落纖萍散龜行細草開主人偏好事終不厭頻來

贈朱慶餘校書

風泉盡結冰寒夢徹西陵越信楚城得遠懷中夜興樹
停沙島鶴茶會石橋僧寺閣連官舍行吟過幾層

酬吳之問見贈

已當聽雁夜多事不同居故疾離城晚秋霖見月疎
鐘關靜戶帶葉卷殘書盪槩期南去荒園久廢鉏

出關後寄賈島

故國知何處西風已度關歸人值落葉遠路入寒山多
難喜相識久貧寧自閑惟將來往信遙慰別離顏

春日寄友人

春居無俗喧時立澗前村路遠少來客山深多過猿帶

巖松色老臨水杏花繁除憶文流外何人更可言

早春越中留別盧元休

此行經歲久唯約半年回野渡人初過前山雪未開雁
群逢燒斷林色映川來是夜蘆中宿嚴家有釣臺

留別南徐故人

三年蒙見待此夕是前程未斷却來約且伸臨去情潮
回灘鳥下月上客船明他日南徐道緣君又重行

送淮陰縣令

隋堤楊柳煙孤棹正悠然蕭寺通淮戍蕪城枕楚田魚
鹽橋上市燈火雨中船故老青葭岬先知宓子賢

送張諲之睦州

遙憶新安舊扁舟去復還淺深看水石來往逐雲山到
縣餘花在過門五柳閒東征逐子去俱隱薜蘿間

長安送人

京國多離別年年渭水濱空將未歸意說向欲行人雁
度池塘月山連井邑春臨分惜攜手日暮一沾巾

送僧歸江南

洗足北林去遠途今已分麻衣行嶽色竹杖帶湘雲饑
鼠緣危壁寒狸出壞墳前峰一聲磬此夕不同聞

同處士秋懷少室故居

曾居少室黃河畔秋夢長懸未得回扶病半年離水石
思歸一夜隔風雷荒齋幾遇僧眠後野菊頻經鹿踏來

燈下此心誰共說傍松幽徑幾多苔

韓評事別業

門枕平湖秋景好水烟松色遠相依罷官餘俸租田種
送客回舟載石歸離岬游魚逢浪返望巢寒鳥逆風飛
嵩陽舊隱多時別閉目閒吟憶翠微

夏日寺居寄楊侍御

雨過北林空晚涼院閒人少掩斜陽十年多病度落葉
萬里亂愁生夜床終欲返耕甘性拙久慚他事與身忙
還知謝客名先重肯為詩篇問楚狂

送石協律歸吳

僧窓夢後憶歸耕水涉應多半月程幕府罷來無藥價

紗巾戴去有山情
夜隨靜渚離蛩語
早過寒潮背井行
已讓辟書稱抱疾
滄洲便許白髭生

送郭秀才歸金陵

夏後客堂黃葉多
又懷家國起悲歌
酒前欲別語難盡
雲際相思心若何
烏下獨山秋寺磬
人隨大舸晚江波
南徐舊業幾時到
門掩殘陽積翠蘿

送廬岳僧

浪匝湓城嶽壁青
白頭僧去掃禪局
龕燈度雪補殘衲
山日上軒看舊經
泉水帶冰寒溜澀
薜蘿逢雨曙烟腥
已知身事非吾道
甘卧荒齋竹滿庭

潯陽與孫郎中醺回

別酒已酣春漏前
他人扶上北歸船
潯陽渡口月未上
漁火照江仍獨眠

送僧

草履初登南客船
銅瓶猶貯北山泉
衡陽舊寺秋歸後
門鎖寒潭幾樹蟬

御定全唐詩錄卷第七十一

全唐詩話卷之二十一

三

此處為書寫區域，包含多條垂直欄位，目前內容極其淡隱，難以辨識。



